

CH'EST NIN PÔSSIBE CHA !

Comédie en trois actes et 4 tableaux
de

Christian DERYCKE

Répertoire SABAM

L'ACTION

Gérard Bermont est prépensionné depuis peu. Les élections communales approchent et il s'est inscrit comme candidat sur la liste du MPR. Soucieux de bien mener sa campagne, il chamboule son living pour en faire son bureau de campagne, il se dote d'une secrétaire, d'un conseiller ce qui exaspère son épouse Josiane, à tel point qu'elle aussi décide de se lancer...sur une liste concurrente imitée par sa fille Débora qui elle a opté pour un parti jeune et très rêveur. La confrontation des trois candidats, vivant sous le même toit est attisée par les collaborateurs de chacun qui viennent se mêler à la vie familiale. Quand approche le jour fatidique des élections, l'ambiance est à son comble...

DECOR :

Le living d'une maison assez cossue. Le bureau (avec sa chaise) trône au milieu de la scène en lieu et place du salon. Au fond, dans un vestibule d'entrée monte à gauche l'escalier pour l'étage et à droite, la porte d'entrée principale (visible ou non).

Fond scène à droite, un coin bar avec deux hauts tabourets et juste à côté du bar, sur le mur droit, une baie vitrée donnant sur le jardin. A l'avant scène, même côté que la baie vitrée, on trouve la porte du salon. (qui était l'ex bureau). Côté Jardin, avant scène, une porte style "western" donne accès à la cuisine. Dans le prolongement jardin vers fond scène, se trouve la porte de la salle de bain.

Côté cour, entre la baie vitrée et la porte salon, il y a une petit dressoir sur lequel on trouve notamment le téléphone.

Côté jardin, entre la porte cuisine et salle de bain, un fauteuil est resté (faute de place dans le nouveau salon)

DISTRIBUTION :

Gérard BERMONT :

tête de liste au MPR. Mari de Josiane et papa de Débora

DEBORA :

Fille de Gérard et Josiane

Hubert CARBEAU :

Conseiller et ami de Gérard.

JOSIANE :

Epouse de Gérard et maman de Débora.

NATHALIE :

Copine de Josiane.

Gilles DUPONTEL :

Tête de liste RPP

J-B :

Membre de la liste AMD. Un illuminé un peu déjanté.

EMMA :

La secrétaire choisie pour Gérard par Hubert.

MATTHIEU :

Le copain de Débora.

ACTE 1

Scène 1 : Gérard - Débora

(Au lever du rideau, Gérard fait le passe-passe entre le bureau installé milieu scène et le salon d'où il apporte tous les objets utiles : garniture, dossiers...Débora elle est au téléphone)

Débora :

Waie ! Mi ausseui !...Oh ! mi ausseui Matthieu !..Ah non !...Ti d'abord !...Waie, mi ausseui...Bisous...bisous...bisous..! (à chaque passage Gérard lève les yeux au ciel) Non ! Ch'est ti...Ch'est ti qui raccroche in premi...mi je n'sés nin...Non ti !..Allez, raccroche... Allo ...T'és toudis là...Ti non pus te n'sés nin raccrochi !...Bon ! In raccroche à deûs adan !.. T'és prêt ?..Inne ! deûs...trôs (elle ne bronche pas)..T'és toudis là...T'as triché !..Waie, mi ausseui , mais je n'sés nin t'tchiter...Allez raccroche !...Si..(Gérard passe et va près du dressoir pour enlever la prise du téléphone)...Allo ??? Allo ?? Matthieu ? Allo ? T'as raccrochi ...?

Gérard :

Non ! Ch'est mi !

Débora :

Mais infin, ch'est nin possible cha !..De quô te t'mêles ?

Gérard :

J'me mêle de m'facture de téléphone !...Cha fêt bintôt inne heure que t'és otchupé à ç'téléphone. Adan, si in puque te mets inne demi-heure pou décider ç'ti-là qui raccroche...

Débora :

Te m'espionnes ma parole ?

Gérard :

Mais non !...Si ch'est des s'crets qu't'as à raconter, va t'mette dins é tchun d'ù qu'in n'intinds rin, mais nin au plein mitan du salon !

Débora :

Impossible !..I a qu'inne seule prise de téléphone dins cheule baraque !..

Gérard :

Ch'est nin Belgacom ichi !

Débora :

Et in puque in a én apparèl qui date de Mathusalem... Cha existe aujourd'hu des postes mobiles !

Gérard :

T'as é portable, non ? T'as qu'à l'employi !

Débora:

J'ai pus d'crédit...Ch'est nin avec chin qu'te m'donnes comme diminche que j'vas fère exploser min compte in banque !

Gérard :
Peut-être, mais avec les factures de téléphone que j'vas
erchevoir, ch'est l'min des comptes qui va exploser !

Débora :
Chin qu'te peûs être radin !

Gérard :
Chin qu'i n'fôt nin intinde !..Je n'sus nin radin, j'gère min budget
! L'vie elle ést de pus in pus tchir, mais in n'gane nin puque à
l'av'nant, surtout depuis m'pré r'traite in puque, adan, i fôt serrer
s'chinture. Mais te n'peûs nin comprinde cha, vu qu'pou
l'momint, te n'ganes rin, à part tin chômake et qu'te busies
acore toudis qu'les eurôs i pouss'tent d'seur min dôs pindant
l'nût !

Débora :
Y avôt lonmin !

Gérard :
Y avôt lonmin que quô ?

Débora :
Que te n'm'avôs nin erprochi d'nin avwar de boulôt !

Gérard :
Ch'est nin é r'proche, ch't'inne constatation. Ermarque, si te
vôs dins l'p'tites annonches é posse de standardisse, te peûs
sauter d'seur à pids joints !..(il rit en continuant)

Débora :
Papa !...T'és chiant ! In peût savwar chin qu'te fés là ?..Te vas
ertapisser tin bureau...?

Gérard :
Non !...J'installe min bureau d'campane !

Débora :
Tin quô ?

Gérard :
Min bureau d'campane !..Hier in a lanchi l'campane pou les
prochines élections communales...

Débora :
Ah ! Et adan ?

Gérard :
Quô et adan ? Si te veûs l'savwar j'sus tête de lisse du MPR.

Débora :
Le MPR !???...Ch'est nouveau cha ? Cha veût dire quô ?
Mouv'mint des Pères Radins ? (elle rit)

Gérard :
Ch'est malin ! Ch'est l'mouv'mint pour la réussite..

Débora :
La réussite ? La réussite de quô ?

Gérard :
Bin...la réussite...La réussite de tertousse...fère que les gins i
sait'tent loï les deûs bouts à l'fin du môs...que...que...mais in
dôt acore fignoler nou programme ..

Débora :
Et ch'est pou cha qu't'as viré nou salon pou mette tin bureau à s'plache !

Gérard :
J'ai b'son de l'plache...Te m'vôs erchevoir mes collaborateûs...la presse dins ç'cotche là ?

Débora :
Et t'as averti maman ?

Gérard :
Te sés bin que t'mère elle s'otchupe nin gramint de m'vie professionnelle !

Débora :
Non ! Mi j'te parle de sin salon qui a déménagi ?

Gérard :
Ah ! Non ! Je n'li ai rin dit , mais elle va comprinde !

Débora :
J'sins qu'tin mouv'mint pou la réussite i va d'jà réussir à mette el broule dins l'ménache !..Et ...cha va t'rappporter quô tout cha ?

Gérard :
E posse de conseilli communal...D'éch'vin peut-être...Et tchi qui sét, bourgemète !

Débora :
Et bin tchan qu'te s'ras bourgemète, te saras bin m'treuver inne plache de standardisse à l'hôtel de ville ? Non ?...Quô que, à ç'momint là, te pourras fère payi tes notes de téléphone pa l'commune.

Gérard :
Quô ?..Ah non ! ..Ch'est justemint é point d'nou programme !...Pus d'avintache pou les élus !...Cha jomès !

Débora :
I n'fôt jomès dire jomès !..(on sonne)

Gérard :
Va t'in ouvère l'uche !..

Débora :
Oh ! Me v'là d'jà uchi !...Merci monsi l'bourgemète !

Gérard :
Débora ! Te m'énerves !

Scène 2 : Gérard - Débora - Hubert - Josiane

Hubert :
Bonjour mam'zelle. Gérard i ést là ?

Débora :
Monsi l'bourgemète ?..I ést dins sin cotche.

Hubert :
Pardon ?

Débora : Vous êtes tchi ?...pardon ! Tchi que j'dôs annonchi ?

Hubert : Hubert...Hubert Carbeau...Sin bras drôt...sin conseilli...sin..

Débora : Sin p'tit tchin quô ! Inne seconde , j'l'appelle. Monsi l'maïeu, i a vot' corbeau qui ést là.

Hubert : Non ! Carbeau..Hubert Carbeau.

Gérard : Fés nin attintion, Hubert. Te connôs les jomes...

Hubert : Waie, bin seur !...Bin que mi, j'n'ai nin d'afants...J'sus célibataire.

Débora : E vi jeun' homme ?! Tchi qui sét ! Ach'teure que vous êtes dins le MPR...vous allez réussir à trouver vot' pointure ! (elle rit)

Gérard : Débora, cha suffit !..Laiche nous si te veûs bin...In a d'l'ouvrache.

Débora : Ok Boss !..Ar'voir, monsi Carbeau...(elle sort en aboyant)

Hubert : Cha m'a l'air d'inne gaillarde et'file. Elle n'a nin s'langue dins s'poke.

Gérard : Surtout au téléphone, waie !...Allez ! donne-mi é cop d'mogne.

Hubert : Te déménages ?

Gérard : J'installe min bureau d'campane.

Hubert : In plein mitan d'tin living, comme cha ?!..Te n'penses nin qu'cha va gêner ?

Gérard : Gêner tchi ?...J'sus t'à m'majon, j'fés chin que j'veûs, non ? I m'fôt de l'plache. Là ch'ést pus p'tit qu'dins inne bwate d'ardines !

Hubert : Bin seur, mais là, te n'saras pus bougi..

Gérard : Ch'ést foq pou l'temps de l'campane. Allez vins !

Hubert : Cha va qua minme durer deûs môs...Et t'finme elle ést d'accord avec cha ?

Gérard : Oh te n'vas nin t'y mette ti ausseui ! Josiane et mi in ést é couple...Te sés chin qu'cha veût dire é coupl'..

Hubert :
Waie ! Ch'est ête à deûs !

Gérard :
Ti bin seur, te n'peûs nin comprinde cha min p'tit Hubert...Ti é célibataire indurchi !..E coupl' cha veût dire...voulwar el bonheû et l'réussite des projets de l'ote...minme si i fôt fère des sacrifices..

Hubert :
Bougi sin salon par eximpe ?

Gérard :
Par eximpe !..Josiane elle t'ra tout ausseui imballée qu'mi...peut-ête puque que mi !..(il sort salon suivi d'Hubert)

Hubert :
Si te l'dis !

Josiane :
(entrant avec des sacs à provisions, chargée comme une mule.) Et y a personne qui pourrôt v'nir m'donner...(elle pousse un cri) Aah !..Quô qu'ch'est que ç'Capharnaüm. (Gérard et Hubert viennent déposer des dossiers sur le bureau) Gérard !..Quô qu'te fous ?

Gérard :
Et bin te l'vôs !..J'installe min bureau ! (il sort)

Hubert :
Sin bureau d'campane !...(il sort)

Josiane :
(criant) Gérard !..T'és tché su t'tête ou bin quô ?..In n'va nin vive avec tin bureau in plein mitan de l'piche...Et min salon d'ù qu'i ést ?

Gérard :
(revenant) I ést par là...Avec el télé et l'chaîne hifi.

Josiane :
Mais in n'sét nin bougi là n'dins !

Gérard :
Ch'est bin pou cha que j'm'installe ichi. (il sort)

Hubert :
(qui suit toujours) Ch'est foq pou deûs môs !

Josiane :
Deûs...deûs môs ?...Gérard !..Te vas m'fère el pléji de tout ermète in plache comme d'vant...

Gérard :
Infin chérie, ch'est pou l'campane électorale. J'sus tête de lisse et..

Josiane :
J'm'in fous !..Ch'est nin inne réjon pou trinsformer m'majon in hall de gare.

Hubert :
Dins tous les partis i a é bureau d'campane.

Josiane :
J'vous ai rin d'mindé à vous...D'abord vous êtes tchi ?..Quô qu'vous fêtes ichi ?

Gérard :
Ch'est Hubert, min conseilli.

Josiane :
Ah waie !..Et pourquô qu'i n't'as nin conseilli de l'fère à s'majon à li tin bureau d'campane ?

Hubert :
Ah non !..I a nin d'plache..In puque j'vis avec em'vièle maman.

Josiane :
Justemint, cha li f'rôt de l'distraktion...

Gérard :
Josiane !

Josiane :
E bureau d'campane !..Te t'prinds pou Sarkozy ou quô ? Et m'tchusine, te comptes nin l'installer au guerni, non ?

Gérard :
In vlà asseui, Josiane ! J'sus à m'majon et..

Josiane :
Ch'est l'minne ausseui. Adan t'ermets tout in plache...et nin dins deûs môs, sinon ...

Gérard :
Sinon quô?

Josiane :
Euh...j'treuv'rai bin ! (elle sort furieuse dans la cuisine)

Hubert :
Elle ést imballée, là ?

Gérard :
Cha va, cha va !..Ch'est l'seurprise...I li fôt l'temps d's'habituer !

Débora :
(descendant) In a d'jà des problèmes avec l'opposition, monsi l'bourgemète ? (rire)

Gérard :
Te vôs Hubert, in ést d'jà in train d'm'espionner.

Débora :
J'te l'avôs dit qu'cha n'li plairôt nin !

Gérard :
Standardiste, espionne et diseuse de bonne avinture. J'comprinds nin qu'te n'treuves nin d'boulôt avec tous tes qualités !

Hubert :
N'oublie nin qu'in a rindez-vous chez l'photographe pou les affiches !

Gérard :
J'me tchange et j'arrive ! (le téléphone sonne) Hubert, réponds !..Et si ch'est pou m'file, raccroche ! (il sort vers les chambres)

Hubert :
Allo ? Waie !..Ch'est ichi, waie !..Non, j'sus sin conseilli..Hubert Carbeau. (Débora aboie, Josiane vient de la cuisine et installe sa planche à repasser) E rindez-vous ?

Josiane :
Mais i n'fôt nin vous gêner...Elle a nin l'téléphone non pus vot'mère ?

Hubert :
Chut ! J'intinds pus !..E rindez-vous, bin seur...à tcheule heure...Attendez j'prinds de quô noter...

Josiane :
Et in puque i donne des rindez-vous aveuc min téléphone !..

Hubert :
Chut ! Waie !..

Josiane :
Kemint chut !? Vous allez raccrochi immédiat'mint !

Hubert :
Inne seconde, ch'est seul'mint..

Josiane :
Je n'veûs nin savwar tchi qu'ch'est...Raccrochi !

Hubert :
Attendez ! J'note !

Josiane :
Vous allez raccrochi, waie !

Débora :
Attinds ! J'sés k'mint qu'i fôt fère. (elle tire la prise)

Hubert :
Allo !...Allo !...Et vlà ! Elle a raccrochi !..

Débora :
Non ! Ch'est mi !

Hubert :
Ah ch'est malin !! J'ai minme nin eu l'temps d'noter.

Gérard :
(revient finissant de se préparer) Quô qu'i s'passe ?..Tchi qu'ch'étôt ?

Hubert :
Ch'étôt la presse...I s'ont donné é rindez vous, mais j'n'ai nin eu l'temps d'noter, in m'a copé la chique .

Josiane :
Non seul'mint te vires min salon, mais in puque t'implôs not' téléphone...Tout cha pour quô ?

Gérard :
Inne plache de conseilli...ou d'éch'vin..

Débora :
Minisse peut-être ! (elle rit)

Josiane :
Pasque te busies qu'te vas ête élu ?..(elle s'esclafe et sort cuisine)

Hubert :
Elle ést imballée, là ?

Gérard :
Zut ! (voyant la planche à repasser) Josiane !..quô qu'ch'ést qu'cha ?

Josiane :
(revenant avec un panier de linge) Inne tafe de ping-pong !

Gérard :
Te n'vas qua minme nin erpasser ichi ?

Josiane :
Bin si, pourquô nin ?

Gérard :
Infin d'habitude te fés cha à l'tchusine !..Nin dins min bureau !

Josiane :
D'habitude tin bureau i n'ést nin ichi non pus !

Hubert :
In dôt vrémint y aller, Gérard...I va nous attinde !

Gérard :
Va-t'in erpasser ailleurs qu'ichi, in n'sét d'jà pus bougi ichi n'dins !

Josiane:
L'fote à tchi ! Non ! J'y sus, j'y resse !

Gérard :
(sortant derrière Hubert) Te m'décôs vrémint, Josiane !..

Josiane :
Et cha n'fét que k'minchi, fés- mi confiinche.

Hubert :
Elle ést imballé...

Gérard :
(furieux) Fés avant, ti ! (ils sortent)

Scène 3 : Josiane - Débora

Débora :
Te vas vrémint erpasser ichi, dins l'living ?

Josiane :
Bin seur que non ! Ch'étôt pour l'fère marvoyi...Non mais te l'as intindu ?..J'fés chin que j'veûs,...ch'ést m'majon...I n'm'a jomès parlé comme cha.

Débora :
I a s'tête qui k'minche déjà à gonfler adan qu'i n'ést minme nin acore élu !

Josiane :
I d'vint carrémint lolo, waie !..T'as d'jà vu cha, mette sin bureau in plein mitan, comme cha.

Débora :
Et cha n'fét que k'minchi. L'pire i resse à v'nir à m'n'avisse.

Josiane :
 Tout cha pou cheule politique. J'te prévins, mi je n'vas nin l'supporter.

Débora :
 Cha arrive souvint. Tchan qu'te busies au nombe des hommes politiques qui ont eu des problèmes de ménache...Clinton, Mitterrand, Sarkozy..et tous les otes qu'in n'sét nin !

Josiane :
 Mais te parles des grands là...Tin père i n'va nin ête présidint des Etats-unis, i va ...peut-être ...ête conseilli communal !

Débora :
 Et si i d'vint éch'vin..? Cha veût dire toudis ête in vô pou inne réunion, inne ducasse à moules, inne inauguration par chi, inne fête de quarti par là...Résultat, i n's'ra jomès pus à s'majon.

Josiane :
 Hein ?..Ah non !..D'jà qu'ach'teure qui ést ichi i n'fout rin...Erwète, cha fét huit jours que j'li ai d'mindé de tonde el pelouse et d'tailli les arbustes...Rin, i n'a acore rin fét...Cha d'vint l'forêt vierge !

Débora :
 Te pourras ingagi é jardini !

Josiane :
 Si te pines qu'in a des yards à dépinser pour cha .. J'y pinse, Clinton, Mitterrand et tous cha, i s'ont eu...i s'ont eu...

Débora :
 Des maitresses ?! Bin seur !..Aveuc tous les finmes qui tourn'tent autour d'eustes, forchémint, i tchèt'tent toudis d'seur inne qui leu tape dins l'oel.

Josiane :
 Te vôs tin père aveuc inne maîtresse ?..I s'débroule déjà nin aveuc mi...Adan s'i n'd'a deûs ?

Débora :
 Tchang'mint d'pature réjouit les veaux. Et pus ch'est des vwasses in puque.

Josiane :
 L'vaurin. Si j'apprends cha, j'li arrache ses zis !..

Débora :
 Mais te vas l'apprinde. In va s'fère é pléji d'venir t'raconter d'masse d'histware d'seur sin dôs !

Josiane :
 Ch'est l'infer que te m'décrie là !..I a l'chance d'avwar pris s'prér'traite à 55 ans...I a foq deûs môs qui n'oeuve pus...I ést in bonne santé...Quô qu'i avôt b'son de s'lanchi là n'dins.

Débora :
 I a p'tête peur de s'imbêter. Cha existe l'déprime des nouveaux pansionnés...Tout d'é còp s'sintir inutile...

Josiane :
Si i s'imbête, i a qu'à fère el pelouse !...Si i ést déprimé, i a qu'à s'otchuper d'mi, j'vas l'ermonter. Et si i s'sint inutile, j'ai inne liste qui ést prête aveuc tout chin qui a à fère ichi...

Débora :
Ichi !? Justemint, ichi, cha n'l'intéresse nin. Ch'ést déyors qui veût ête.

Josiane :
Et mi ? Quô que j'dôs dire ? Cha fét trinte ans que j'sus intre quate murs.

Débora :
I a rin qui t'impêche de ti ausseui fère des activités...Tins, fés comme li, de l'politique.

Josiane :
Ch'ést cha..Et min nettiyache, mes lessives, min repassache, tchi qui va l'fère ?

Débora :
Ch't'é choix dins la vie !..Si t'aimes mi rester l'métchinne !

Josiane :
Je n'sus nin l'métchinne, j'sus inne mère au foyer !

Débora :
Ah bon !..Et elle ést d'ù el différinche ?

Josiane :
(après un silence) Débora...Te m'énerves à la fin !

Débora :
Ti ausseui ? Décidémint, ch'ést m'journée à mi !

Josiane :
Te devrôs ête continte d'avwar eu inne maman qui étôt toudis là pou s'otchuper d'tout. Te viras tchan qu'te s'ras marii et qu't'aras des afants .

Débora :
D'abord, cha ch'ést nin d'mogne la vèle, in puque, mi, je n's'rai jomès l'esclafe de m'n'homme. J'aré min boulot et..

Josiane :
Pou cha, i faudrôt in trouver in !

Débora :
Acore ? ! (s'énervé) Cha fét deûs fôs in é quart d'heure qu'in m'erproche d'ête au chomache. Mes propes parints in puque...

Josiane :
Je n't'erproche rin ..

Débora :
Te constates, waie, j'sés ! Après tout, mi j'sus continte que papa i fét de l'politique...Peut-ête que si i ést élu, j'treuvrai é boulôt...pasqu'i fôt du piston aujourd'hu.

Josiane :
Calme-tô et donne-mi é cop d'mogne pou tout ermète à l'tchusine.

Débora : T'as qu'à l'fère tout seû...T'as toudis été habituée, non, ...l'finme au foyer !

Josiane : Débora !...D'ù qu'te vas ?

Débora : Cachi du boulôt !..

Josiane : Te rintes pou mingi à midi qua minme ?

Débora : Je n'sés nin !...J'ervinn'rai tchan qu'j'aré treuvé ! (elle sort furieuse)

scène 4 : Josiane - Nathalie

Josiane : (sortant cuisine avec son panier de linge) In tout cas, j'plains l'malheureûs qui va tchère sur ti...Sale caractère ! (Nathalie, en tenue sportive entre discrètement. Josiane revient et est saisie) Oh ! Nathalie ! Te m'as fêt peur !

Nathalie : Salut Jojo !..k'mint qu'i va ma grande (elles s'embrassent)

Josiane : Cha va ! Mais je n'm'attindôs nin à t'vir...Au fèt t'és rintrée par d'ù ?

Nathalie : Pa l'porte !...(rire outrancier) J'allôs sonner, l'porte elle s'a ouvèr et j'ai jusse eu l'temps de m'garer pou laichi passer l'TGV qui vudôt !

Josiane : Ah ! Ch'est Débora, m'file !..Elle s'in va cachi du boulôt !

Nathalie : Miyard ! Décidée comme cha, elle va seur'mint treuver. In arôt dit qu'elle avôt inne fusée dins sin..

Josiane : (la coupant) mais....quô qu'i m'vaut l'pléji de t'visite ?

Nathalie : Et bin j'vins t'tcheure..

Josiane : M'tcheure ?..Pou aller d'ù ?

Nathalie : Et bin à la gym ? T'as oublii ?

Josiane : A la gym ?..Ah waie !..Mais je n'sés nin si..

Nathalie : Ah non !..Te n'vas nin t'dégonfler...In s'a vu i a é môs au marché, j't'ai parlé des cours de gym d'ù qu'j'allôs et te m'as dit qu'cha t'plérôt d'venir avec...

Josiane : Waie ! Bin seur !..mais ch'êtôt jusse avant les vacances et..

Nathalie : Justemint ! Les vacances ch'est fineui, et t'as seur'mint inne paire de kilos à perde.

Josiane : Ah bon !? Cha s'vôt tant qu'cha ?..Mais acoute ...Nin aujourd'hu...J'ai d'masse d'ouvrache et...

Nathalie : Taratata !...Te l'fras après t'n'ouvrache !..Te n'd'as nin inne louche d'ête toudis intre quate murs...

Josiane : Parfôs waie !

Nathalie : Et bin ! I fôt vudi ma vièle !...Profiter d'la vie !..In n'd'a qu'inne !..T'és in train d't'interrer vivante là ! Fés des activités !

Josiane : Waie ! M'file ausseui elle dit cha. Et min ménache ?

Nathalie : T'n'homme i ést nin in prépension ?

Josiane : Depus deûs môs, si !

Nathalie : Et bin réjon d'puque. Ach'teure i peût t'assister et ti prinde du temps libe !

Josiane : Li ? I n'a nin l'temps, pasque monsi i s'lanche dins la politique.

Nathalie : Dins l'politique ? Aïe, Aïe, Aïe !..Adan i ést puque que temps d'treuver d's'activités ma grande, pasque te l'viras pus !

Josiane : Merci, in m'l'a d'jà dit !

Nathalie : Allez ! Va t'in t'mette in t'nue, j't'attinds ! Dis-mi, ch'est espécial l'décoration d'tin living !..T'ouvèr é guichet d'poste peut-ête ?

Josiane : Non ! Ch'est Gérard, m'n'homme !..I prépare les élections. I a installé sin bureau d'campane !

Nathalie : Et te l'laiches fère ?..Houla ! I étôt vrémint temps qu'j'arrive...Ch'est carrémint inne momie qu'te vas advenir !

Josiane : T'as réjon ! Mi ausseui j'dôs vive, m'éclater !..Deûs mineutes, j'arrive !

Nathalie : A la bonne heure !..mais fés à t'n'aïje ! L'cours ch'est foq dins inne demi-heure..(Josiane sort dans les chambres. On sonne)

scène 5 : Nathalie - Gilles - Josiane :

Josiane :

(voix off) Va ouvèr te veûs bin !

Nathalie :

Ok !..Mais si ch't'é soyeûs, j'te prévins, je l'vire !...(ouvre) Monsi ?..Ch'est pourquô ?

Gilles :

Ch'est bin ichi qu'elle resse Josiane Bermont ?

Nathalie :

Waie !..Ch'est pou é sondache ?..Ou bin pou annonchi qu'elle a gani é voyache à Bangkok si elle acate vou bricole ?

Gilles :

(riant) Non ! Rasseurez-vous j'n'ai rin à vinde..Vous permettez madame Bermont ? Je n'vous imbêt'rai nin lonmint (forçant l'entrée)

Nathalie :

Ch'est que je n'sûs nin..

Gilles :

Nin bin habiyi, nin d'importance. J'aime bin les sportifs. Ch'est des gins qui sait'tent acore chin qu'ch'est l'effort, qui sait'tent dépasser leu limites..

Nathalie :

Non, chin que j'veûs dire ch'est que..

Gilles :

Je n'vous tindrai nin lonmint. Je m'présinte : Gilles Dupontel, présidint du RPP.

Nathalie :

Intchantée...Ch'est quô le RPP ?

Gilles :

Ch'est l'parti du Rassiblement pou l'progrès.

Nathalie :

Ah ! Vous fêtes ausseui de l'politique ?

Gilles :

Comme vot'mari, waie madame !

Nathalie :

Ah non mi je n'sus nin..

Gilles :

Vous n'êtes nin dins é parti, je l'sés et ch'est justemint l'réjon de m'visite....Vous savez chin qu'i va s'passer ach'teure que monsi Bermont i s'lanche in politique ?

Nathalie :

Cha va d'venir é pourri !

Gilles :

(s'étrouglant) Non !..N'fôt nin exagérer !..Mais vous n'allez jomès pus l'vir !

Nathalie :

J'm'in fous, je l'vos d'jà jomès...J'ai d'jà essayi d'vous dire que..

Gilles :

Ah bon !..J'vôz ! L'ménache i ést d'jà d'seur inne patte ?!
Compris !.. Adan cha s'ra pus facile pou mi d'vous fère
em'proposition.

Nathalie :

Inne proposition ?..Mais assijez-vous monsi Dupontel !

Gilles :

Nin d'méprise ...madame...Inne proposition honnête..

Nathalie :

(déçue) Ah !..

Gilles :

Vlà ! Vous savez seur'mint qu'les lôs électorales i impos'tent
d'avwar d'seur nou liste é pourcintache de finmes. Adan, j'vous
l'demint simplemint...Est-ce que vous t'riez d'accord d'ête
d'seur not' liste du RPP ?

Nathalie :

Mi ?...Fère de l'politique ?

Gilles :

Pourquô nin ?..Ch't'én ingag'mint citoyen et tout s'apprend.

Nathalie :

Ch'ést que je n'peûs nin décider cha pasque..

Gilles :

J'comprends vot'sintimint !..Vous busii à vot'mari..Ch'ést nin cha
bin seur qui va améliorer les r'lations dins vot'couple..Mais
comme vous m'avez dit qu'vous vous in foutez !

Nathalie :

J'vous ai dit cha pasque je...

Gilles :

N'in dites nin puque...Premire règle in politique : n'étalez jomès
vot'vie privée..Acoutez madame Bermont, j'sus pou les
finmes...J'aime bin les finmes..

Nathalie :

Ah waie ? (soudain troublée)

Gilles :

Les finmes, in politique j'parle !..Elles ont gramint à nous
apporter...

Nathalie :

Surtout des vwasses !

Gilles :

Bin seur ! Mais imaginez qu'vous soyiz élue !? Vot'vie elle va
tchangi. Vous vous veyi éch'vine de l'famille..ou bin du sport
?..Vous advindrez inne ote finme et vous avez des décisions à
prinde !..

Nathalie:

(se lève et va pensive vers l'escalier) Ch'ést vré qu'ch'trot
p'tête é bon service à t'rinde ma cocote !

Gilles :
Vous dijiez ?

Nathalie :
Non ! J'réfléchis tout yaut...J'dijôs que m'vie...elle s'rôt tout ote !...Mi qui sus toudis insérée intre quate murs..

Gilles :
Fineui tout cha !..Vous t'rez d'mindée tout partout !

Nathalie :
Et min nettiyache, min repassache...

Gilles :
Les finmes de ménaches ch'est nin fêt pou les tchins ? Non ?

Nathalie :
Waie mais (geste d'argent avec les doigts)

Gilles :
Aveuc é trait'mint d'éch'vine, vous serez minme vous payi é tchusini si vous voulez !

Nathalie :
Et bourgemète, ch'est acore puque ?

Gilles :
Bravo !..J'sins in vous inne finme d'imbition !...J'aime bin cha, Josiane ! vous permettez que j'vous appelle par vou p'tit nom ?...Adan ? In peût compter su vous ?

Nathalie :
Allez waie !..Tant pire !..In vira bin s'réaction !

Gilles :
Ah cha !..J'peûs vous dire qu'i n'tra nin contint !

Nathalie :
Tchi cha ?

Gilles :
Et bin vot'mari !..Signi ichi !

Nathalie :
(distraite) Non j'vous parle de Josiane !

Gilles :
(riant) De Josiane !? Infin ch'est vous Josiane !

Nathalie :
Hein ? Ah waie ! Ch'est vré !..Fôt m'estchuser !..Ch'est ..l'émotion !

Gilles :
Binv'nue au RPP madame Bermont !..Josiane !..J'vous imbrache !

Nathalie :
Et bin ch'est d'jà cha d'gani !

Gilles :
In puque, j'aime bin vot'majon !..Avec é grand bureau comme cha in plein mitan..Ch'est idéal pour installer é bureau d'campane ! (Josiane entre)

Josiane : Vlâ j'sus prête ! In y va !..Oh pardon !..Bonjour monsi...monsi ?

Nathalie : Monsi Gilles Dupontel.

Gilles : Présidint du RPP...J'sus v'nu d'minder à..

Nathalie : Faudra nous estchuser monsi Dupontel mais in ést à la bourre là !..In a é cours de gym dins dix mineutes...

Gilles : J'vous laiche !..In s'ervira acore souvint...Ach'teur j'connôs l'kemin..(lançant à la cantonnade en sortant) Ar'voir madame...Ar'voir Josiane !..

Josiane : Josiane ?? I m'a app'lée Josiane ?

Nathalie : Et bin..Pasque ch'ést tin nom ?!

Josiane : Cha, je l'sés bin !..Mais k'mint qu'i l'connôt ?...J'l'ai jomès vu mi ç'gaillard ?..Tcheule affronté !

Nathalie : Waie ! Bon ! Te n'vas nin fère é fromache pasqu'i t'a app'lée Josiane ...Te d'vrôs ête continte...I ést pos mal du tout !

Josiane : J'm'in fous...Je m'deminde k'mint qu'i m'connôt ?

Nathalie : Bon ! In y va !?

Josiane : Et ch'ést quô le RPP ?

Nathalie : E parti politique !...J'pinse !...In va ête in r'tard !..(poussant Josiane vers la sortie)

Josiane : Acore el politique ?

Nathalie : (sortant derrière Josiane) Waie !..Mais cha m'a l'air fort bin comme parti...(le reste se perd en coulisse)

Noir

scène 6 : Débora - JB

(JB est un type très cool, légèrement pouilleux, le style philosophe révolutionnaire, mais toujours nébuleux et mou)

Débora :

(entrant suivi de JB) Vous n'pinsez nin qu'ch'est fort idéalisse tout chin qu'vous m'racontez ?

J-B :

Tout chin qu'te m'racontes !..J'te l'ai d'jà dit 10 fôs..Le nous ch'est inne barrire...Ch'est l'mur qui sépare les classes...Ch'est l'barbelé qui t'impêche d'aller vers l'ote..vrèmint...In profondeur !

Débora :

Waie ! Ch'est bon, ch'est bon ! J'ai compris. Au fèt, ch'est quô, tin nom ?

J-B :

J-B (jibi) et ti ?

Débora :

Débora !

J-B :

Débo ! Mi j't'appelle Débo. J'treuve que les prénoms in trôs syllabes ch'est de l'perte de temps.

Débora :

Comme te veûs !...Te dis Débo et te copes el "ra"

J-B :

Tcheu rat ?

Débora :

Et bin l'ra d'min nom ! Débo..Ch'est Débora sans "ra" !

J-B :

(réfléchissant) Débora sans ra ?? (riant soudain mollement)
Ch'est tordant...J'aime bin tin humour ma soeur !..

Débora :

Ma soeur ?..T'és nin min frère ?!

J-B :

Mais si ! In ést tertousse frères et soeurs vu qu'in vit tous dins l'minme grand jardin qu'est not'tère !

Débora :

Acore des grandes idées cha ?

J-B :

Ch'est aveuc les grandes idées qu'in va tchangi l'monde...I n'd'a marre des politicards in cravate qui babèl'tent pou rin dire...

Débora :

Non ! Chin qu'i a ch'est qu'in n'comprend nin chin qu'i dit'tent !

J-B :

Ch'est fèt exprès ! Pou indormir le peuple et fère tout chin qu'i veut'tent...I a pus d'opposition..I sont tertousse d'accord...I n'd'a marre des mous !

Débora :

Et ti, t'és é dur ?

J-B :

Parfait'mint !..Cha n'se vôt nin comme cha, mais j'sus plein d'forche, et violence..intérieur'mint...Tout i ést pourri...(en baillant) I fôt tout démolir !

Débora :

J'pinsôs qu't'étôs non violent ?

J-B :

Bin seur !..Tchan que j'parle de tout démolir, ch'ést les idées du monde qu'i fôt briji...et...et....T'arôs nin inne séquô à bware ?

Débora :

Pou éteinde tin fût intérieur ? Te veûs quô ?..

J-B :

Whisky si t'as ?

Débora :

Du J and B ? (elle rit...lui rit à retardement et mollement)

J-B :

J'adore tin humour !

Débora :

L'alcool, cha n'ristche nin de l'fère esploser cheule forche qui ést in ti ?

J-B :

(vidant d'un trait) Non ! Je gère !

Débora :

Ah j'vôs waie ! T'as du boulot, ti ?

J-B :

Nin officiel, non ! Sinon j'irôs nin à l'Onem. J'travale au monde de d'mogne.

Débora :

In buvant du whisky et in feumant des pétards ?

J-B :

Cha, ch'ést pou s'donner du corache !..Pasqu'i a du boulot !...In a créé é parti et in s'présinte à les élections !

Débora :

Ch'ést vré ? Tcheu parti ?

J-B :

AMD...Amoureûs du monde de d'mogne.

Débora :

Ah cha sonne bin !

J-B :

Not' slogan, ch'ést : "E monde sain pou des gins énergiques"

Débora :

Waouh !...Et..Ch'ést ti qui és tête de liste ?

J-B :

Waie ! Infin, i fôt dire que pou l'momint in ést foq à chinq d'seur el liste.

Débora : Chinq amoreûs du monde de d'mogne ? Ch'est nin gramint !

J-B : Justemint, in cache des candidats...et des candidates !

Débora : J't'intinds v'nir avec tes gros chabôts !...Nin non ! Nin mi !..D'abord, el politique, cha n'm'intéresse nin et pus, min père i ést ausseui tête de liste .

J-B : Ah bon ! ? Dins tcheu parti ?

Débora : Au MPR.

J-B : Ch'est nin vré ?.. Chez les socioécolohumanolibéraux ?

Débora : Oh ! Oh ! T'imballes nin..Avec tous tes diminutifs, ch'est quô cheule soupe ?

J-B : Justemint ! Ch'est de l'soupe eç'parti là !..Pou fère leu programme, i s'ont pris tout chin qui avôt d'bon dins chaque parti...Ch'est nin MPR qui s'arot'tent d'vu l'app'ler, mais Royco !

Débora : Si ch'est tous des bonnes idées ?

J-B : Mais ch'est irréalisable !...Te n'sés nin fère pléji in minme temps au commerçant et au cliint, à l'ouvrii et au patron...Te n'sés nin promète des belles rues et in minme temps dire qu'in va abachi les taxes...Et bin eustes, ch'est chin qu'i font.

Débora : Promète, i font tous cha !

J-B : Nin nous otes !..Nous in annonche que cha s'ra dur...qu'i faudra serrer l'chinture de s'maronne pou in vudi...L'capitalisme i nous a mené dins é goufre de d'ù qu'in dôtt vudi...In dôtt arrêter de n'busii qu'à les yards, les vagances, la bouffe...A propos..t'arôs nin inne petite séquô à bec'ter, j'ai nin eu l'temps d'déjeuner ç'matin et...

Débora : Ah ch'est cha !...Waie ! I ést puque que temps qu'te minges inne séquô pour vudi du goufre...Jibi ! Vins par ichi !

J-B : J'aime vrémint gramint tin humour !..Ch'est original comme taf' de salle à mingi...in dirôt é bureau !

Débora : Ti ausseui t'as d'l'humour à chin qu'j'intinds...Ch'est é bureau !(ils sortent cuisine)

Scène 7 : Gérard - Hubert - J-B - Débora

Gérard :

Infin, Hubert, te penses vrémint qu'ch'est nécessaire, inne secrétaire ?

Hubert :

Bin seur !..T'in sortiras jomès autremint : l'courri, la presse, les rindez-vous...te vas ête noyi !

Gérard :

Bon...mais t'étôs p'tête nin obligi d'in tcheusir inne ausseui...ausseui..

Hubert :

Canon !..Ah ch'est vré qu'ch'est de l'belle marchandise !..Min père i dijot toudis, tcheusir inne finme, ch'est comme tcheusir é costume ou bin des sorlets...L'tale et l'pointure, te t'in fous, chin qui compte, ch'est l'air que t'aras tchan qu'te vas vudi avec !

Gérard :

Ch'est cha qu't'és célibataire !

Hubert :

Peut-ête waie !..Ch'est toudis m'mère qui a tcheusi mes costumes et mes sorlets !

Gérard :

Je n'vôs toudis nin l'rapport avec em'secrétaire ?

Hubert :

Elle s'ra souvint avec ti dins les réceptions officielles, l'imache, ch'est fort important !

Gérard :

Et Josiane, elle n'a nin l'imache qu'i fôt ?

Hubert :

A intinde es'réaction t't'à l'heure, j'ai nin l'sintimint qu'elle va t'suve !..Et pus, pou ti, pou l'boulot, ch'est qua minme pus agréabl' de dicter inne lette à inne jome et jolie secrétaire qui sint bon putôt qu'à..

Gérard :

Waie ! Waie ! Cha va !..Mais d'ù qu'elle joke ? Elle in met du temps pou garer s'vôture.

Hubert :

Attinds , j'vas vir !

Gérard :

Au fait, ch'est kemint sin p'tit nom ?

Hubert ;

Emma !..Ch'est bô hénon, Emma ! (il sort)

Gérard :

(s'asseyant à son bureau) Hum ! Emma !..(J-B sort de la cuisine pour aller au bar)

J-B :

J'minque d'équilibr' d'seur inne djambe...Et pus l'temps qu'te prépares...t'as vu qu'j'afonne dins é temps record...

Débora :
L'boutèle elle ést d'seur el bar.l'amoureûs du monde !

J-B :
Ah ! Tin humour...T'és vrémint top biche ! (il esquisse quelques pas de danses en fredonnant très mal une chanson anglaise style "we are champions my friends...") Salut min frère !

Gérard :
(qui ne l'a pas quitté des yeux) Min...min frère ?..D'abord j'ai nin d'frère et de deûs...

J-B :
Cool Raoul !

Gérard :
Non Gérard !..

J-B :
Pénard ! Gérard !..Te t'in jettes in p'tit avec mi ?

Gérard :
Non merci !...(réalisant) Mais...Fôt nin vous gêner...Ch'ést min whisky !(il lui arrache la bouteille des mains)...pasque vous êtes ichi à m'majon et j'aim'rôs bin savwar tchi qu'vous êtes et chin qu'vous fêtes ichi ?

J-B :
Chin que j'fés ?..Là ?

Gérard :
Waie !

J-B :
Et bin j'allôs prinde é p'tit apéro avant d'aller mingi é morcheau par là dins l'tchusine !

Gérard :
Ah bon !..Pasqu'in puque te vas mingi d'seur min compte..et dins m'tchusine !

J-B :
Tin whisky ! Et 'majon ! Tin mingi...Te n's'rôs nin inne mioche possessif min frère ?

Gérard :
Arrête de m'app'ler tin frère...J'sus fils unique !

J-B :
Ah bin ch'ést cha !..Cha n'm'étonne nin !..Ch'ést seur'mint cha qui a ingindré dins tin caractère cheule tindance à tout t'nir pour ti tout seû.

Gérard :
(appelant) Débora ! Débora !

J-B :
Et Débora ch'ést ...???

Gérard :
Ma file !

J-B :
Te vôs ?..Acore ce "ma" qui ervint !...Ah !...Donc ch'ést vous...

Débora :
Quô qu'i a papa ?

Gérard :
Kemint quô qu'i a ? J'rinte ichi, j'm'assis à min bureau..

J-B :
Min !

Gérard :
Vlà que j'vôs ç'grand...ç'grand...(J-B grimace imitant Gérard)...ç'grand sinche qui va dins min bar !

J-B :
Min !

Gérard :
Qui prind min whisky...

J-B :
Min !

Gérard :
(s'énervant) Acoute Débora...Te dis à tin australopithèque d'arrêter d'jouwer avec "mes" nerfs pasqu'autremint i va prinde "min "pid dins "sin"..

Débora :
Ch'est bon !..Pos la peine de t'écaufer !..J-B t'arrêtes tes conn'ries ?

J-B :
Ch'est nin des conn'ries !..Acoute-le parler...I ést hyper possessif, ce mec !

Gérard :
I erkeminche ?!

Débora :
Cha suffit !..J'te présinte min père ..! Papa, j'te présinte J-B !

Gérard :
J-B ?

J-B :
Et waie ! Comme tin whisky ! (il reprend la bouteille)

Gérard :
Ch'est li qui fét esploser mes notes de téléphone ?

Débora :
Mais non !..Hier je n'le connichôs minme nin !

Gérard :
Et aujourd'hu, te l'invites dins nou majon pou mingi ?! Ah !..J'ai compris !..t'as trouvé é boulot de standardiste au Zoo et t'as ouvert inne cache !

J-B :
Ch'est d'famile j'intinds tin sins de l'humour !

Débora :
In s'a rincontré à l'Onem, et in a distchuté. In ést ervenu insonne et j'l'ai fét rintrer, vlà tout ! Te n'vas nin in fère é plat !

J-B :
A propos d'plat, n'oublie nin min goufre !

Gérard : J'vôs..Ch'est inne espèce de SDF...de pique assite ?

Débora : Et à cose de tchi qu'i a des SDF, hein ? A cose des humaécosociauxnololibéraux comme ti !

Gérard : Les quô ?

J-B : Te peûs dire Royco !...T'as tout compris...Te vôs Débora, dins not'monde de d'mogne..

Débora : Va mingi ti, cha va cramer !

J-B : Waie ! Tout i va cramer...i fôt détrure les vièles idées !..Allez, salut collègue !

Gérard : Collègue ??

J-B : (venant serrer la main de Gérard) Waie ! Mi ausseui j'sus tête de liste ...mais dins én ote combat ...Bonne chance à ti, amisse et...

Débora : Va mingi !

J-B : Merci ma soeur !(il sort cuisine)

Gérard : Ma soeur ?..Ah non ! Cha voudrôt dire que j'sus tin père...Infin Débora, quô qu'te cafoules avec...avec...

Débora : Avec é sinche te l'as d'jà dit ! Je n'te savôs vrèmint nin si sectaire,papa..

Gérard : Non ! J'sus prêt à atcheuillir n'importe tchi, mais...li..In n'sét nin d'ù qu'i pleut monhomme !

Débora : T'és prêt à atcheuillir n'importe tchi si i t'moute sin CV et sin certificat d'bonne condute, ch'est cha ?

Gérard : Acoute Débora...J'dôs soni m'n'imache...Si in sèt que m'file elle a des droles de fréquentations...

Débora : Quô ? J'va d'vwar et'donner inne liste des gins avec tchi que j'sors peut-être ?...Te n'va nin m'fère suve par la police secrète ausseui, non ?

Gérard : Mais non, mais..

Débora : Cha d'vint tout duch'mint fasciste comme comportemint...

Gérard :
N'dis nin d'bétises !...Débora !...Adan..t'as toudis rin treuvé
comme boulot ?

Débora :
Si !

Gérard :
Super !..Ch'est quô ?

Débora :
J'me lanche dins la politique !...J-B ! In ést à 6 ! J'sus
candidate ! (sortant cuisine)

J-B :
(voix off) Yes !

Gérard :
Débora ! Non ! Débora n'fés nin cha !..(il la suit)

Scène 8 : Emma - Hubert - Gérard

Emma :
Et bin heurus'mint qu'vous étiz là !...Chin qu'vous êtes doué
au volant ! Vous êtes pilote de rallye ou inne séquô comme
cha seur'mint ?

Hubert :
Mais non !..I a rin d'extraordinaire à fère é créneau !

Emma :
Qua minme ! Du premi cop, comme cha !...Et pus vous êtes é
crac in mécanique...Vous avez treuvé l'marche arrire tout
d'seute !

Hubert :
Vous n'saviz nin d'ù qu'elle étôt l'marche arrire ?

Emma :
Non !..In fèt, je n'savôs minme nin qu'i n'd'avôt inne des
marche arrire.

Hubert :
Infin, i a toudis inne marche arrire d'seur inne vôtüre.

Emma :
Minme d'seur inne automatique ?

Hubert :
Bin seur ! Autremint k'mint fère pou..pou vudi d'vot'garache par
eximpe !

Emma :
Ah bin ch'est cha ! J'ai nin d'garache, donc nin b'son d'marche
arrire....Mais waie ach'teure que vous l'dites....Vous êtes
intelligent vous hein ?..Ou putôt ch'est mi qui ést bête (rire)

Hubert :
(soupirant) Mais non ! Mais non !..Sur vot'votüre, i a des freins
ausseui !

Emma :
Oh n'vous moquez nin d'mi...In fèt ch'est nin m'voture, ch'est cheule de min grand père...I m'l'a prêtée..

Hubert :
I n'd'a pus b'son ?

Emma :
Bin si pourquô ?

Hubert :
Pou rin ! pou rin !...Vous n'avez nin d'vôture ?

Emma :
Si ! Mais elle ést au garache ...in réparation.

Hubert :
Inne panne ?

Emma :
Non ! En accidint !..J'ai pris inne bordure in béton...

Hubert :
In feyant é créneau ?

Emma :
Vous riez vous ! Non ! Inne bordure l'long d'l'autoroute. J'arôs pouvu ête tuée !

Hubert :
Oh pardon ! K'mint qu'ch'est arrivé ?

Emma :
In fèt, j'étôs in contre sins d'seur l'autoroute !

Hubert :
Hein ?

Emma :
Bin quô, cha peût arriver à tout l'monde...Vous vous trompez jomès d'côté vous ?

Hubert :
Nin d'seur l'autoroute, non !

Emma :
J'avôs intindu à l'radio qu'i avôt é conducteu dins l'movès sins...Et j'treuvôs cha drole, pasqu'i s'éto'tent tous dins l'movès sins...A é momint, i n'd'a in qui a doublé in fache..j'ai jusse eu l'temps d'braquer pou l'éviter ç't'andoule !

Hubert :
Kemint, ç't'andoule...Mais li i étôt in drôt !..Ch'est vous qui n'deviz nin ête là !...Vous n'avez nin été cochi ?

Emma :
Non !..Ch'est l'principal hénon !..Ch'est l'carrossi qui m'a dit cha : tant qu'ch'est foq de l'tole à erdréchi...

Gérard :
(à la cantonnade) T'és majeure et vaccinée !..Te fés chin qu'te veûs, mais laiche-mi t'dire que cha n'me fét nin pléji du tout !

Hubert :
Gérard, j'te présinte Emma...Emma, monsi Gérard Bermont !

Gérard :
Ah waie ! Bonjour !

Emma :
Bonjour monsi Bermont...Intchantée et ravie de pouwar ouvrir avec vous...J'sus tout intire à vot'service...Vous pouvez m'deminder chin qu'vous voulez, tchan qu'vous voulez !...

Hubert :
(géné) Hum ! Waie ! bon ! In n'est pus au temps des esclaves qua minme, hein !

Emma :
Cha n'fét rin !..Parle maîte, t'servante elle acoute !

Gérard :
Rasseurez-vous, je n'vous d'mindrai nin l'impossibe..Vous tapez ?

Emma :
Jomès ! J'sus pus douche qu'inne peluche...J'sus contre l'violence !

Gérard :
Non ! J'vous d'minde si vous savez taper d'seur é clavi d'ordinateû ?

Emma :
Ah waie ! bin seur !

Gérard :
Vous vous débrouiyi bin avec word ?

Emma :
Mi j'me débroule avec n'importe tchi. J'sus fort sociabe...Ach'teure si ç'monsi i ést inglés...

Gérard :
Tcheu monsi ?

Emma :
Et bin, monsi Word !

Gérard :
Word ...Ch'est é trait'mint d'texte...Mam'zelle...si vous voulez bin m'attinde deûs mineutes par là ? (la fait sortir dans le salon)
D'ù qu'te l'as treuvé t'perle rare ? Au muppet show ?

Hubert :
Comme si ! Ch'est inne de nou militante acharnée...et ch'est Chavanel qui m'a parlé d'elle in dijant qu'elle f'rôt bin l'affaire comme secrétaire.

Gérard :
Et pourquô qu'i l'a nin pris pou li, Chavanel ?

Hubert :
Je n'sés nin mi, pasqu'i veut t'rinde service ?..

Gérard :
M'rinde service ? In m'inveyant inne berlire parèle dins les djambes ? I veût m'couler, waie !

Hubert :
 Laiche -la au moinsse fère ses preuves !

Gérard :
 Infin, Hubert ! Elle comprind rin à chin qu'te li dis cheule file.
 Te dis taper, elle pinse qu'in fét d'la boxe...Word pou elle ch't'é
 monsi Inglés...Te pines qu'elle a d'jà vu én ordinateû ?

Hubert :
 Prinds-la à l'essai...In vira bin chin qu'elle vaut !

Gérard :
 Tchince jours !..Et pou les réceptions, si l'imache elle s'ra belle,
 in a tout intérêt à nin mette el son !

Hubert :
 Ch'est vré qu'elle n'a nin invinté l'moule à tarte..

Gérard :
 L'moule non ...Mais pou l'tarte !...(ils entrent dans le salon)

**scène 9 : Josiane -Nathalie - Hubert - Gérard - Emma - J-B -
 Débora**

Josiane :
 Infin, t'és nin gênée ti !..Te sés k'mint qu'cha s'appelle cha
 ?..Inne usurpation d'idintité.

Nathalie :
 Mais Jojo, mi j'sus seure que cha t'frôt du bin d'avwar inne
 activité extérieure...Te vas finir par ête prise de l'courte halinne
 ichi n'dins !

Josiane :
 Nathalie ! I m'sonne que j'sus adulte et que j'décide acore mi
 minme chin que j'fré de m'vie...mais mi, je n'fés nin d'politique !

Nathalie :
 Ch'est jusse mette tin nom d'seur inne liste...rin qu'pou fère
 marvoyi t'n'homme.

Josiane :
 Je n'dôs nin mette min nom d'seur inne liste pou cha !...T'as
 qu'à mette el tin des noms. Adan, te téléphones à tin Gilles
 Dupontel et te li dis qu'j'erfuje.

Nathalie :
 Mais Jojo..Réfléchis bin..

Josiane :
 Et estim'te continte que je n'porte nin plainte (elle sort vers les
 chambres)

Nathalie :
 (la suivant) Jojo !..Acoute !...

Hubert :
 J'ai dit à monsi Bermont qu'ch'est monsi Chavanel qui m'avôt
 parlé d'vous..

Emma :
Waie ! Ch'est min mononke !

Gérard :
Ah bon !...Comme quô l'hérédité !

Emma :
J'ai l'ai quô ?

Hubert :
Non ! Rin !..Mais i faudra bin travailler, hein ! Apprinde à taper d'seur én ordinateû, invoyi l'courri, ouvère el courri ..

Emma :
Si j'invô l'courri, je n'saré pus l'ouvère...Vous veyi qu'vous ausseui vous vous trompez d'sins parfôs...(rire)

Hubert :
Non ! I a l'courri qu'in invô et i a l'courri qu'in erchôt et qu'i fôt ouvère !..

Gérard :
S'tromper d'sins ? Quô qu'elle veut dire !..

Emma :
Ch'est pasqu'i a nin lonmint...

Hubert:
Et surtout, vous d'vrez apprinde à vous taire !

Gérard :
Oh waie ! Surtout in public !

Hubert :
Si vous fêtes bin tout cha, monsi Bermont i ést prêt à vous prinde à l'essai.

Emma :
Ch'est vré ? Vous m'ingagi ?

Gérard :
Tchan que j'promets inne séquô, je n'fés jomès marche arrire !

Emma :
Ah cha mi non pus....pasque les créneaux ...

Hubert :
Waie !...Ch'est bon !..Vous pouvez ermercii monsi Bermont (elle se jette à son cou brusquement lui donnant accidentellement un coup de tête dans l'oeil. Débora sort de la cuisine avec J-B)

Débora :
Te vôs J-B ! I t'a traité d'sinche...li ch'est putôt les guenons !

J-B :
Acore inne qualité héréditaire...Vous avez du goût pou tcheusir l'sexe opposé !

Débora :
Ch'est cha Ché Guévara !...Amène ta fraise, in va erfaire el monde !(ils sortent)

Gérard :
Débora ! Débora ! Attinds ! Mais ch'est inne furie cheule file !

Emma :
Pardon ! Pardon ! Ch'est tell'mint que j'vous aime bin et que j'sus continte...Attendez, j'ai inne pommade espéciale dins min sac !

Gérard :
Hubert ! Immène-la !..Ch'est miss catastrophe que te m'as treuvée là !

Emma :
Ré à t'tout ! Tchan que j'fés inne bétise, ej répare !

Gérard :
Ah bon ! Et cha fét combin d'années qu'vous réparez ?

Emma :
Assijez-vous là et serrez vou zis pasque si i a de l'pommade qui va n'dins, cha pique !

Hubert :
Vous êtes seure que ch'est de l'pommade pou cha ?

Emma :
Bin seur ! Ch'est min grand père qui m'l'a donnée. Li i met cha d'seur ses varices ...cha les fét dégonfler !

Gérard :
Ch'est nin inne varice que j'ai à m'n'oel, ch't'é cop d'boule !

Emma :
Bon ! In s'calme !..Chin qu'vous êtes excité !

Gérard :
J'étôts fort calme tchan qu'vous n'étiz nin là !

Emma :
Oh tcheu doudouche !...Vous serrez vou zis ?

Hubert :
Mi j'erwète nin cha ! (il se retourne)

Emma :
In puque cha n'vous cout'ra rin, vu que ch't'à l'oel !..(rire bête)

Gérard :
Elle a d'l'humour in puque !...Elle est parfaite et'perle rare!

Emma :
Attintion j'y vais ! (elle s'approche très près de la figure de Gérard. Josiane arrive des chambres) Vous virez que j'sus douche...Laichi-mi fère...cha vous f'ra du bin !..

Josiane :
Gérard !...Quô qu'te fous avec...Avec cheule glinne ?

Gérard :
Ch'est ..ch'est m'nouvelle secrétaire et...et..

Emma :
Et j'li ai tapé dins l'oel !..

Josiane :
J'vôs cha ! Waie !...Nathalie !..Téléphone à Gilles !

Nathalie :
Waie ! Waie !..J'sés ..te l'as d'jà d'mindé !

Josiane :

Téléphone tout d'sute à Gilles Dupontel pou li dire que j'sus
d'accord !...Mi ausseui j'va in fère de l'politique !
(Nathalie crie "waie", Gérard crie "oh non" et sur ce tombe le

rideau

ACTE 2

Scène 1 : Gérard - Hubert

(au lever du rideau, Gérard fait les 100 pas tandis qu'Hubert est assis au bureau. Une affiche géante de Gérard est apposée au mur. On peut y lire ce slogan : "pour réussir demain")

Gérard :

Te t'rinds compte de chin que j'vis ichi depus inne seminne ?...Ch'est l'infer !

Hubert :

Ah ! ? Et ch'est pire que d'avant ?

Gérard :

Non mais quô qu'te groules dins tes dints là, mache langue ? In a toudis été fort heureûs j'qu'ach'teure Josiane et mi.

Hubert :

Quô qu'te veûs...La politique cha d'minde des sacrifices !

Gérard :

D'accord ! Mais de là à foute min ménache in l'air ? !

Hubert :

Oh fôt nin pousser qua minme ! Elle ne te soutint nin, d'accord, mais de là à...

Gérard :

Elle ?? Em'sout'nir ?..Elle me déchind in flamme, waie !..Ch'est la DCA...Tatatata !Infin, t'és naïf ou bin quô ?..Elle ést inscrite d'seur inne liste concurinte...Tout chin que j'fés, tout chin que j'dis ch'est noté, interprété, déformé...

Hubert :

Min pov' Gérard ! Et waie ! Jésus ausseui i a été trahi par un d'ses pus proches !

Gérard :

Waie et après in l'a cloé d'seur inne crô, au pilori..d'seur el plache publique...Ah j't'ermencie..Si te comptôs m'ermontier l'moral !...Ch'est là qu'elle va m'donner l'cop d'grâce...d'seur la plache publique.

Hubert :

Infin, ch'est t'finme qua minme !?

Gérard :

Justemint ! Je l'connôs m!..Tchan qu'elle ést may, elle va jusqu'au bout ! Et tout cha à cose de cheule...de cheule toupile que te m'as am'née comme secrétaire.

Hubert :

Ch'est vré, j'l'erconnôs : elle ést nin fut'fut' mais de là à..

Gérard :

Nin fut'fut' ?..Elle ést pus bête que mes dôts d'pids, waie ! Tins ! Hier, j'li dis qu'in d'vrôt prinde tous les documints de min ordinateû pou les mette d'seur ç'ti là qui ést au bureau du

parti..."Et k'mint que j'fés ??” Qu'elle me dit avec es n'air de balouse !..

Hubert :

(riant) Te l'imites bin !..

Gérard :

Ah j't'in prie, cha n'me fét nin rire !

Hubert :

Pardon !..Fôt tout copii d'seur inne clé USB.

Gérard :

Merci ! Je l'sés bin ! Ch'est nin mi qui ertarde de deûs heures, hein, ch'est elle !

Hubert :

Pardon !

Gérard :

Donc, j'li dis : “fôt tout mette d'seur inne clé USB. Et je l'vôs qui s'in va in dijant, d'accord !

Hubert :

Elle n'd'avôt inne dins s'vôture ?

Gérard :

Ch'est chin qu'j'ai busii ausseui !...Elle ést ervenue tros quarts d'heure après !

Hubert :

D'ù qu'elle avôt été?

Gérard :

A clé mineute ! D'minder inne clé USB ! Te t'rinds compte de l'ingin ?

Hubert :

Elle va apprinde !...E jour à l'fôs !

Gérard :

Mais ch'est nin cha l'pire !..Chin qu'elle ne sét nin fère, ch't'à dire à peu près tout, je l'fés mi-minme...Non, l'pire ch'est que Josiane elle peut busii que ch'est m'petite amisse !

Hubert :

Quô ? Pou l'histware de l'ote jour là ?..Elle pinse que...Ch'est ridicule, te li a nin dit ?

Gérard :

Mais si ! Dix fôs ! Vingt fôs !..Elle ne me crôt nin !...Et elle jeuwe d'jà bin sin rôle de politique...: “ch'est bin connu, au MPR in mint comme in respire” !

Hubert :

Ch'est elle qui dit cha ?

Gérard :

Waie ! Oh ! Et i a mi qu'cha !..MPR cha veut dire : les Maris Partis in Riboulginque !

Hubert :

I fôt li réponde !

Gérard :
J'essaie ! Mais je n'd'ai deûs su l'dos !..Pasque m'file elle met ausseui sin grin d'sé !

Hubert :
Et bin ! Cha dôôt ête djai les repas d'famille !

Gérard :
Les r'pas ?..Tcheu r'pas ? I n'd'a pus des r'pas ! Ch'est sandwiches et pizzas à tour de bras !..Si cha continue j'vas parler italien couramint !

Hubert :
Elle..Elle fêt pus à mingi ?

Gérard :
Non !...Te n'savôts nin : "ch'est fineui el temps de l'finme esclave" !

Hubert :
Et ti ? L'tchusine ?..

Gérard :
Non ! Mi rin qu'pou casser én oeuf, j'ai b'son d'é mode d'implô, adan !...Et pus, i n'fôt nin s'aplatir non pus !..Si j'tins nin bon, et que j'fés l'tchusine, d'abord i n'vont rin mingi pasque cha s'ra infecte et pus ch'est mi qui t'ra roulé dins l'farine !

Hubert :
Bravo ! Gérard ! Là j'ertreuve bin in ti l'vré homme politique...qui n'tchange nin d'route minme dins les difficultés et qui est prêt à...

Gérard :
(éclatant en sanglots sur l'épaule d'Hubert)..Je n'd'ai marre de mal mingi....

Hubert :
Allez ! Allez !.. L'meilleure définse, ch'est l'attaque...C'midi, j't'invite au resto !

Gérard :
Merci Hubert !..Cha va m'ermette cha !..J'ming'rôs la capitale !

Hubert :
Eh oh,oh !..In s'fêt é p'tit resto...Je n'sus nin Crésus !

Gérard :
Bin seur !..E bon steack frites...

Hubert :
Ah ? ! Autremint j'connôs inne bonne pizzeria...

Gérard :
Ah non !

Hubert :
(riant) Mais j'te fés marchi !..Et pou l'histware d'Emma ausseui, in dôôt contrattaquer !..In d'vrôt lanchi des brut su t'finme..Par eximpe...Elle ést souvint aveuc es'copine là...Nathalie ...In pourrôt laichi intinde que...elle et t'finme....

Gérard :
Josiane ? Aavec inne finme ?..Cha n'va pus non ? Ch'est nin possible cha !..Je l'connôs bin et j'connôs ses idées là d'seur !..

Hubert :
Bin seur que ch'est nin vré !...Mais les gins i crot'tent tout !

Gérard :
Mais ch'est dégueulasse !.

Hubert :
Non ! Ch'est de l'tactique politique !

Gérard :
Je n'veûs nin salir Josiane !

Hubert :
J'fineui par crware que t'ersonnes vrémint à Jésus !..In t'fous inne maque et te tournes et'tête pou n'd'erchevoir inne d'l'ote côté...Ch'est cha ?

Gérard :
Non ! Mais..

Hubert :
In va réfléchir, in treuv'ra bin ote cose !...Allez in y va ?

Gérard :
Non ! Nin comme cha !..J'ai ouvré au jardin..Te vôs que j'fés tout pou la paix !

Hubert :
(regardant par la baie vitrée) Au jardin ?..T'as k'minchi pa l'debout adan, pasqu'in n'vôt nin l'différinche !

Gérard :
J'comprends nin toudis tin humour, Hubert !..J'prinds inne douche et j'me tchange !. Pindant ç'temps-là, va au jardin et k'minche pa l'début !...(il sort SDB, Hubert hausse les épaules, se sert un verre, puis sort dans le jardin)

Scène 2 : Josiane - Gilles - Nathalie

Josiane :
(entrant suivie de Gilles et Nathalie) Je n'vôs nin pourquô que j'devrôs tchangi d'look !..J'me sins fort bin comme ej'sus !

Gilles :
Bin seur !...Vous êtes fort bin, vous êtes charmante, très jolie et...

Nathalie :
Et mi ? Je n'dôs nin tchangi d'look ?

Gilles:
(peu intéressé) Mais non ! Mais non !..

Nathalie :
Ch'est que mi ausseui j'sus d'seur el liste !

Gilles :
Waie ! Bin seur ! Mais nin in tête et pus..vous êtes fort bin comme cha !

Nathalie :
Compris !..In s'otchupe des têtes de listes, l'restant ch'est du bétal !...Bon ! J'me sers !

Gilles :
Ch'est cha ! A l'abreuvoir...euh j'veûs dire au bar !...Comme j'vous dijôs...Dites..Cha n'vous déringe nin si in s'dit "te" ??(Nathalie vide un verre)

Josiane :
Non ! Chin qui m'déringe, ch'est que "te" veûs m'tchangi !

Gilles :
Non ! T'és inne finme superbe...Pleine de charme...

Josiane
Et bin adan ?

Gilles :
Mais pou les photos d'inne campane, i fôt t'donner é style...I fôt qu'les gins tchan qu'i t'vot'tent i t'erconnaich'tent à tin style...Tins ! Erwète cha (montre la photo de Gérard) Ch'est plat !..

Nathalie :
Normal ! Ch't'inne affiche !

Gilles :
Ch'est frôd, sans vie..ch'est nul !

Josiane :
Mi j'treuve qu'i ést bin su cheule photo Gérard !...Quô qu't'in dis Nathalie ?

Nathalie :
I ést naturel !..In dirôt toudis qu'i a é baton d'brouche planté dins sin...

Josiane :
Oh waie cha va !..Te l'aimes nin , in l'sét bin !..(Nathalie boit un verre)

Gilles :
N'impêche Nathalie elle a réjon...I ést naturel...I a nin de style !

Nathalie:
J'ai nin dit cha, j'ai dit qu'in dirôt tout...

Gilles :
Waie ! Cha va !..In a intindu !

Nathalie :
Ah bon ! Compris !..L'bétal !...A l'abreuvoir ! (elle boit un verre)

Josiane :
Et vous m'véyi..

Gilles :
Te m'vôs...(la reprenant)

Nathalie :
Les veaux...ch'est du bétal (nouveau verre)

Josiane :
Nathalie ! T'arrêtes de boire ?..Et te m'vôs dins tcheu style ?
Mère au foyer ? Finme d'affère ?...Finme de vie ?

Gilles : Te dôs donner l'imache de l'finme du 21^e siècle !

Josiane : Ah cha , cha m'éclaire bin te vôs !..Sardou i tchantôt l'finme des années 80, mais l'finme du 21^e siècle...là...

Gilles : Ch'est inne finme qui....qui est seure d'elle...qui assume tout chin qu'elle fêt...mais qui resse fort maternelle ...et qui warde tout sin charme féminin et tout s'sensualité !

Nathalie : Et bin tcheu programme !...Ech'vine, mère au foyer et pute !...Tout cha in minme temps (elle vide un verre)

Gilles : In n'vous a jomès appris l'politesse et de nin vous mêler de l'conversation des...

Nathalie : J'sus mimbe du parti...J'ai min mot à dire..In puque j'sus d'seur el liste..

Gilles : Mais vous êtes là comme inne pompe à vwasses !..Pou pousser l'liste !

Nathalie : Inne pompe ? Mi ?..Et pou pousser ? Inne pompe ch'est pou aspirer...(vide un verre) Balochard !

Josiane : Nathalie ! Cha suffit ! T'és complèt'mint bouli !

Nathalie : T'as intindu ? I m'a dit qu'j'étôs inne pompe !

Josiane : Waie ! Et bin t'as pompé asseui !

Gilles : Waie ! Pinsez à l'imache du parti !

Josiane : L'imache, l'imache !..In dirôt qu'i a qu'cha qui compte pou vous..Pou ti !

Gilles : Bin seur !..Les gins i s'ont b'son de s'accrochi à inne imache. In dôt s'moutrer comme inne sètchi que l'majorité des gins elle a invie d'suve...In dôt incarner chin qu'les gins i s'attind'tent.

Nathalie : Superwoman !..Marilyn !..Mère Thérésa !

Gilles : Vià ! Ch'est cha ! Elle a compris !

Nathalie : Pou inne pompe...j'sus bin amorcée, hein, Gilou ?

Josiane : Mais je n'sus nin tout cha !..J'sus mi-minme et ch'est cha que j'dôs moutrer...

Gilles :
Jomès !..Jomès l'vie privée...Rin qu'inne imache publique !

Nathalie :
J'ai treuvé pou l'photo !...Plumeau dins t'mogne...Veste tailleur et cravate in yaut...minijupe, bas résille in bas !...(éclatant)

Gilles :
Excellint !...Les trôs in inne !..

Josiane :
Non mais cha n'va pus non ?...Et à mes pids, j'mets des palmes pou moutrer que j'sus sportive ?..Cha d'vint du cirque tout cha !

Gilles :
Ch'est vré que l'cirque et l'politique cha a parfôs des ersonnances !

Josiane :
Waie ? Et bin min nom ch'est nin Bouglionne..adan, j'vas vous moutrer inne paire de mes t'nues et si t'és nin contint...

Nathalie :
T'as qu'à mette tin tchul au vint !(éclate)

Josiane :
Nathalie ! Te d'vins vulgaire !..Pinse à l'imache du parti, infin !..(elle sort chambre)

Gilles :
Ch'est du prope !..J'ai horreur des finmes qui bot'tent..et qui n'sèt'tent pus s'contrôler...

Nathalie :
Mais...j'me contrôle là...Autremint, j't'arôs d'jà sauté d'seur !(elle rit)

Gilles :
J'vous in prie !

Nathalie :
Pourquô qu'à mi te dis toudis "vous"...Pasque j'sus inne pompe ?

Gilles :
Mais non !..Vous...et t'as réjon, j'vas t'dire "te" !

Nathalie :
J'te pompe nin l'air,là ?

Gilles :
Mais non !...Tchan que j'pinse que l'premi cop qu'in s'a vu, j't'ai prise pou Josiane !

Nathalie :
Waie ! Et ch'est comme cha qu'te l'as eue !

Gilles :
Pardon ?

Nathalie :
J'veûs dire que te l'as eu d'seur et' liste...Quô que...min p'tit dô i m'deui que t'aim'rôs p'tête bin inne mioche de puque...

Gilles :
Quô ????? Mais non !

Nathalie :
Eh ! oh !..Dins l'vie privée, hein...nin pou l'imache publique du parti...J'ai des bons zis saite ? I a des pompes à bras...et i a des pompes à zis !

Gilles :
Je n'vôs nin de quô te parles !

Nathalie :
Allez ! Allez ! Gilou...I a qu'à vir k'mint qu'te l'erwêtes !..In dirôt Tarzan d'avant Jane !..Et t'es aussi balou que ç' grand sinche !..

Gilles :
Merci du complimint !

Nathalie :
Te n'sés nin y fère min cousse !..Mi j'connôs bin Josiane, et j'pourrôs t'donner des tuyaux...des tuyaux d'pompe bin seur !

Gilles :
Non merci !..M'n'erlation avec Josiane elle ést professionnelle et...

Nathalie :
Professionnel? T'és é bricoleûs, waie !..Vu qu'te m'as d'jà prise pou elle, j'te donne l'occasion d'répéter avec mi...(ouvre la porte du salon) Tins ! Là i a é divan, cha s'ra parfait !

Gilles :
Mais non !

Nathalie :
Ch'ést foq inne répétition,hein !..In fét simblant !..Mi j'sus Josiane, et ti t'és...t'és..et bin t'és ti !..Ti Tarzan, mi Jane !..Allez concintre-tô inne paire de mineutes, et pus te vins...J'te fés passer tin examen...(elle sort salon)

Gilles :
Non !..Te pourras attinde...

scène 3 : Gilles - Hubert - Nathalie - Gérard - Josiane

Hubert :
Tins ! Monsi Dupontel !..Bonjour !

Gilles :
Monsi Carbeau !..Bonjour !..Je n'vous avôs nin vu..I a ...i a lonmint qu'vous êtes là.?

Hubert :
Oh ! Inne demi heure, mais j'étôs au gardin !..

Gilles :
Ah ! In vous d'minde ausseui de fère el gardin ?! (ricane)

Hubert :
Non ! Au MPR in n'implô nin l'personnel politique..ou l'personnel tout court pou les avintaches privés...Cha ch'ést des pratiques du RPP, non ?

Gilles :
Pou l'gardin j'comprinds...J'ai intindu qu'vot'tête de liste...monsi Bermont...i étôt amateûs d'belles plantes...

Hubert :
L'succès cha amène toudis des jalousies et comméraches, monsi Dupontel...

Gilles :
Ch'est madame Bermont qu'vous traitez d'commère ?

Hubert :
Au MPR in n'veût nin s'abachi à salir les gins avec des ragots...Pou nou chin qui compte, ch'est l'honnêt'té et l'franchise !

Gilles :
Vlà au moinsse é domaine d'ù qu'in ést d'accord...

Nathalie :
(voix off) Gilles ! Gilou !...Ch'est t'petite Josiane qui attends !...Si t'és bin concinré, vins m'moutrer d'quô qu't'és capabe !...J'sus prête !

Gilles :
(toussotant de gêne) Si vous permettez...inne seconde...

Hubert :
Bin seur !...J'intinds qu'in vous attends...Gilou !(ricane)

Gilles :
Non ! ...Ch'est é mal'intindu...ch'est nin...infin...

Nathalie :
(voix off) Adan ! T'arrives, Tarzan ?...(Gilles sort salon)

Hubert :
Oh !..Cha ! Cha vaut inne petite photo ! (il sort fond)

Gérard :
(sortant de la SDB en peignoir et voyant la baie vitrée ouverte) Hubert ?...Hubert !?...Ch'est nin vré qu'i fét l'gardin..! (sortant) Hubert !..(on entend un rire de Nathalie)

Josiane :
(ayant changé de tenue vient des chambres)Gilles !..Gilles ?? Nathalie ? D'ù qu'i sont ces deûs ? Elle est seurmint v'nu malade (porte SDB, puis cuisine) Nathalie ? (voyant baie vitrée ouverte) Après les gins i s'plaint'tent d'ête cambiolé (ferme la baie vitrée. On entend un nouveau rire de Nathalie) Nathalie (Josiane ouvre la porte salon)..mais quô qu'ch'est qu'vous foutez à deûs dins ç'divan (rire de Nathalie)...Et bin ch'est du prope !(elle entre. Gérard vient à la baie vitrée qu'il ne peut ouvrir ..il regarde à l'intérieur..frappe...tambourine...puis fâché repart vers le jardin)

scène 4 : Débora - Emma - Matthieu

Débora :

(soutenant Matthieu qui se plaint et suivis d'Emma) Vous êtes carrément givrée, ou quô ?..Vot'permis , vous l'avez eu dins é kinder seurprise ou quô ?

Emma :

Non ! J'ai horreur du chocolat !

Matthieu :

Min pid...min pid...I ést écrabouilli !..J'parie qu'ch'ést de l'marmelade dins min souli !

Emma :

Oh ! oh ! Inne reus d'voture, ch'ést foq du caoutchouc qua minme..Ch'ést nin pasqu'in passe inne fôs...

Matthieu :

Deûs fos !..Inne fôs in marche avant et é cop in marche arrire...

Emma :

Ah waie ! Vous avez vu, j'l'ai treuvé tout d'seute el marche arrire !..

Matthieu :

Sadique !

Emma :

J'voulôs m'garer conv'nablemint !

Débora :

T'arôs ersatchi tin pid ausseui. Mais t'as nin gramint d'réflexes in dirôt..

Matthieu :

Non mais ch'ést cha !..T'à l'heure cha va ête de m'fote...J'te signale que j'étôs su l'trottoir et qu'ch'ést cheule sauvache ichi qui..

Débora :

Waie ! Ch'ést bon !..Pos la peine d'ermète tin disque, j'étôs là, j'ai tout vu...Allez tcheur de l'glache vous !

Emma :

De l'glache ?..Vous pinsez qu'ch'ést bon pou chin qu'i a ?

Débora :

Bin seur !..Allez !..

Emma :

Euh !..D'ù qu'i a de l'glache ?

Débora :

Dins m'tchambe, dins l'taf de nut !

Emma :

Hein ?..Et bé !..Et cha n'ramolit nin ?

Débora :

Chez vous cha n'dôt pus ramolir ed'trop à m'n'avisse, hein ? Dins l'congélateû, à l'tchusine !

Matthieu :
Oh que j'souffère !..In dôôt aller aux urgences ?

Débora :
Aux urgences?...T'és tché su t'tête ?..T'as invie d'erpérir unijambiste ?

Matthieu :
I a minme nin é divan pou s'allongi ichi ?

Débora :
Te pines vrémint qu'ch'est l'momint de...

Matthieu :
Mais non !..Ch'est pou allongi m'djambe !..I a nin d'salon dins cheule majon ?

Débora :
Si ! Par là !..Ichi ch'est l'bureau d'campane...Là ! Doudouche !..Assis-te su cheule selle et mets tin pids su l'bureau...Cha va comme cha ?

Matthieu :
Ch'est l'paradis (ironique) !

Emma :
Vlà la glache !..J'ai ausseui ram'né inne tchulire !..(elle entre avec une boîte de glace vanille)

Débora :
Inne tchulire pouquo fère...(voyant la glace) Ah !..Waie!...D'accord !..Vous êtes inne arringie, vous hein ?

Emma :
Quô ???Vanile ch'est nin bon, i aime mi chocolat ?

Débora :
De l'glache ...(criant) Des glachons pou mette d'seur sin pid !

Emma :
Oh pardon ! J'avôs mal compris ! (retourne cuisine)

Matthieu :
Cheule lale, minme pos la peine d'essayi é psychiatre..l'seul espoir ch'est é voyache à Lourdes !...Tchi qu'ch'est ?

Débora :
L'secrétaire de min père !...Matthieu, est-ce que j'pourrôs savwar chin qu'te fejšs là ? Ch'étôt inne marche de propagande pour min parti...

Matthieu :
Kemint chin que j'fejôs là ?..J'sus v'nu pou t'vir..Depus 8 jours, pus d'novelles, pus d'cop d'téléphone...Et j'keminche à comprinde pourquô !

Débora :
J'sus fort otchuppée waie, avec el campane électorale !

Matthieu :
Fort otchuppée !..j'ai vu, waie !

Débora :
T'as vu ? T'as vu quô ?

Matthieu :

J't'ai vu pindue au bras de ç'grand touyôt là...qui avôt l'djeulophone et qui criôt des trucs qui n'avot'tent ni tcheu ni tête !..."I fôt tout casser !..L'capitalisme ch't'é bateau qu'i fôt couler !"... I ést famille aveuc Ben Laden ?

Débora :

T'és bête !..Ch'ést JB..Ch'ést li qui m'a fét rentrer..

Matthieu :

T'as d'jà vudi aveuc li..

Débora :

Qui m'a fét rentrer au parti AMD.

Matthieu :

(moqueur) AMD...Les A Monti Débiles ? Ch'ést cha ?

Débora :

Non ! Les Amoureûs du Monde de D'mogne !

Matthieu :

Mi ch'ést aujourd'hu que j'sus amoureûs d'ti..

Emma :

(revenant avec les glaçons) Oh que ch'ést bô !

Débora :

Matthieu ?...T'és jalous ?

Emma :

Matthieu ??

Matthieu :

Pourquô ? L'jalousie ch'ést nin permis dins vot'programme ?..Waie j'sus jalous !..I a d'quô non ! Vir s'copine au bras d'én ote.

Emma :

Ah cha ! Ch'ést nin bin !

Débora :

De quô j'me mêle ? Simploté !..In s'tenôt tous el bras...Ch'étôt inne manif, é meeting, nin inne pourmenade d'amoureûs !..(voyant le bac à glaçons qu'Emma amène) Quô qu'vous voulez qu'in fêche aveuc cha ? Fôt mette les glachons dins é sa et ram'ner én essu..niqu'doule !...(sort cuisine)

Emma :

(réfléchissant) Matthieu...Matthieu..Ah ! J'sés comme l'écrivain !

Matthieu :

L'écrivain ?

Emma :

Waie ! J'sus seure que j'ai lu é live écrit par é Matthieu...mais je n'sés pus l'titre !

Matthieu :

L'évingile !

Emma :

Ah ch'ést cha ! waie !...Et ch'ést vous qui...

Débora :

Adan cha vint ces glachons (Emma sort...Josiane et Gilles sortent du salon soutenant Nathalie "comateuse")

Scène 5 : Matthieu - Gilles - Nathalie - Josiane

Josiane :

Tchan que j'pinse que te f'jôs tous tes m'noules pou m'n'imache ?...Ah ! Elle ést belle el tinne des imaches...

Gilles :

Pusque j'te dis qu'les apparinces i sont trompeuses !...Elle voulôt m'moutrer..

Josiane :

Waie cha va !..J'ai nin b'son d'détals !..Ch'ést ta vie privée cha...Gilles !

Nathalie :

(ayant un sursaut) Min Gilou !

Josiane :

J'li avôs dit d'nin bware !..Elle ne bôt jomès !

Gilles :

Et bin ichi, elle a rattrapé sin r'tard !

Josiane :

Inne poivrote et én obsédé...Ah elle ést belle l'imache du RPP...(à Matthieu) Quô qu'vous foutez là , vous ? N'vous gênez pus surtout !...Aveuc vot'pid su l'bureau !

Matthieu :

Ch'ést pasqu'in l'a écrabouilli !

Josiane :

Réjon d'puque foutez-le ailleurs, vot' pid, vous allez tout salir !

Gilles :

Quô qu'in fét aveuc Nathalie, pasque j'keminche à fatiguer !

Josiane :

I fôt d'l'indurance, Gilou, Nathalie ch'ést inne sportive !..Si te veûs suve el rythme !

Gilles :

Je n'veûs rin du tout !

Josiane :

In va l'mette dins l'tchambe d'amisse, in yaut !..Et vous n'trainez pus ichi !..Ch'ést nin les urginces ichi !

Scène 6 : Matthieu - Débora - Emma - JB

Débora :

Vlà la glache !...Cha va p'tête éteinte el fût de t'jalousie ! (à Emma) Inl'vez li sin souli !

Matthieu :

T'as invie que j'joke infirme toute em vie ?

Emma :
Rasseurez-vous ! J'sus douche ! Comme é cat !

Matthieu :
Oh pou cha waie ! Vous êtes é cas ! (elle lui ôte délicatement sa chaussure) J'ai vu t'mère !...Fort sympa !...Elle m'a indjeulé pasque j'avôds min pid su sin bureau !

Débora :
Elle a rin à dire ! Ch'est l'bureau d'tertousse !

Emma :
Houlà ! Cha n'sint nin l'mimosa , hein ! (rire bête)

Débora :
Attintion ! ch'est frôd !..(elle pose la glace, cri de Matthieu)

Emma :
Cha va ! Cha n'feume nin !

Matthieu :
(la regardant) Chez vous non pus !

Débora :
D'ù qu'elle ést m'mère ?

Matthieu :
Elle vint d'monter avec én homme et inne ote finme qui avôt l'air complèt'mint bourrée ! T'mère in grande tenue...A m'mode qu'elle fét bin la fête !

Débora :
Maman ??? Ah bin cha ! (on sonne) Vous savez aller ouvère, l'marchande de crème à la glache ?

Emma :
Vous n'ariz nin vu monsi Hubert et monsi Gérard ?

Débora :
Ch'est nin l'bureau des rinsein'mints ichi, vu ! (Emma ouvre. JB entre avec son porte-voix dans lequel il parle)

J-B :
Bonjour ! Et merci d'avwar ouvère l'uche ! Salut la compinnie !

Emma :
Miyard j'ai pinsé qu'mes orèles i s'allot'tent esploser...K'mint qu'in appelle acore cha ?

Matthieu :
Inne grande gueule !

J-B :
(scandant) Ch'est foq é début in dôtt continuer l'combat (dans son porte-voix, Emma en extase)

Emma :
Ch'est incroyabe !

Matthieu :
J'treuve ausseui !..Incyroyabe que te traines avec é saisi parèl !

Débora :
J'traine avec tchi que j'veûs, cha va ? Bon J-B ! Te copes el son, te nous casses les orèle !

Matthieu :
Si y avôt qu'les orèles !

J-B :
Ch'est bon cha !..Casser ! Tout casser !..Casser les orèles...Casser les pids !..In dô...
Ah ! Mais j'vôs que casser les pids ch'est d'jà fêt !(montrant le pied de Matthieu)

Matthieu :
Ch'est d'l'humour ???Très marrant !

Débora :
Cha va J-B !..N'in r'méts nin inne couche !

J-B :
Ch'est arrivé pindant l'manif ?

Débora :
Non après !

Emma :
Ch'est mi !..J'ai passé d'seur sin pid !

J-B :
Et bin ! Et cha donne cha ? C'pindant vous d'vez peser...

Matthieu :
Elle oublie é détal !..Ch't'aveuc es'voture qu'elle a passé d'seur min pid...Et deûs fôs acore !

Emma :
J'peûs inne fôs essayi vot'apparèl là ?

J-B :
Ok !..Mais ne l'casse nin hein !

Emma :
(l'imitant) Casser !..tout casser !...J'rigole !

J-B :
Ch'est in d'nou militants ?

Matthieu :
Mi ? Militant ? Seur'mint nin !..Pou aller crier des bernètes comme j'ai intindu dins les rues !

J-B :
Quô qu'te f'jôs là adan min frère ?

Matthieu :
Min frère ?..Acoute min cousse, si j'avôs é frère comme ti, i a lonmint qu'j'arôs tchangé d'nom d'famille !

J-B :
Oh i a pos qu'tin pid qui gonfèle, i a t'tête ausseui !

Débora :
Cha suffit les deûs, waie ?

J-B :
Mais j'ai rin dit, mi, ch'est li qui m'agresse..

Emma :
I n'va nin vot'manikrake !

J-B :
I fôt pochi su l'bouton !

Emma :
Ichi ?...Et quô que j'dis ?

J-B :
Je n'sés nin mi...Vous dites n'importe quô !

Emma :
(criant dans le porte-voix) N'importe quô !...N'importe quô !...
(regard médusé des 3) Eh ! Cha marche !...

J-B :
Ch'est vré qu'elle dins inne voture, et not'planète elle ést in dangi !... Tchi qu'ch'est, l'estropié ?

Débora :
Matthieu ! E copain !

Matthieu :
E copain ??!!

Emma :
(dans le porte-voix) N'importe quô !

Matthieu :
Exactemint, n'importe quô !..Je n'sus nin é copain, j'sus sin copain !

J-B :
Et elle ch'est "ta" copine ? T'és vrémint intourée d'mecs possessifs ti...Cha ch'est "tin" pid et te l'sins...

Emma :
(dans le porte-voix) Nous ausseui d'ailleurs, et cha n'sint nin l'mimosa !

J-B :
Débora ch'est inne personne unique...Elle appartient au monde inti,elle ést nin "ta" propriété !

Débora :
Ch'est nin cha qu'i a voulu dire, Matthieu i ést jalous pasque...pasque..

Matthieu :
Pasque je l'vôs volinti !

Emma :
(idem) Que ch'est bô l'amour !

Débora :
J-B ! Erprinds-li ç'bazar ou bin j'l'infonche su s'tête jusqu'à l'pointe de sin minton !

Emma :
Oh non !..Laiche-mi acore...pou inne fôs qu'in m'acoute !

J-B :
Ch'est nin pasque te parles nin fort qu'in t'acoute nin, mais pasque te dis des conn'ries !

Matthieu :
Tins ! Vià l'borgne qui erproche à l'aveule !

J-B :
Allez ! (très enfantin) Te peûs acore jeuwer avec chinq mineutes!

Débora :
Ah non !

J-B :
Mais te vas jouer au jardin ! Ma soeur !

Emma :
Je n'sus nin religieuse !

J-B :
Non ! Non ! J'sés bin, mais t'és ma soeur qua minme !

Matthieu :
Tcheu famille !

Emma :
J'va crii après mons i Bermont !..I va seur'mint m'intinde avec cha !

J-B :
Ch'est cha ! Bon amus'mint ! (il ferme la baie vitrée) Là ! In ést trintchile !

Matthieu:
Bon ! Et bin j'va vous laichi !..vous avez seur'mint inne..réunion d'parti !

J-B :
Ch'est vré qu'in dôt fère el critique de not'meeting. Au parti AMD in fét chin qu'in n'fét nin dins les otes partis....in fét d'l'auto critique !

Matthieu :
Pou l'critique, j'ai des bonnes idées si vous voulez !...Et pou l'auto, i a l'ote qui ést au jardin là...Vlà ! J'sus in vô !

Débora :
Cha va mi ? Te sés marchi d'seur ?

Matthieu :
T'in fés nin pou mi va !..Je n'voudrôs nin que l'monde de d'mogne i n'tourne nin rond à cose de min pid !

J-B :
Ch'est vré qu'i a des malheurs pus grands qu'cha dins l'monde !

Matthieu :
Attinds que j'passe in vôtüre et que j'te vôs su l'trottoir...te vas in connaitre in des malheurs..

Débora :
Matthieu ! T'as fineui, waie !..Te resses ichi !..j'dôs t'parler !

Matthieu :
Non ! J'sins que j'déringe. In puque si t'mère elle déchind et qu'elle me treuve acore ichi avec min pid su l'bureau, elle va m'écrabouilli l'ote, j'l'ai vu dins ses zis !

Débora :
Bon ! Et bin vins par là dins l'salon !...J-B in s'vira pus tard !

J-B :
Ok ! Mais j'attinds min djeulophone !..J'l'ai eu à prêter à é copain qui l'a eu à in d'ses potes qui connôt l'prof de gym de..

Débora :
Waie ! Bref, te resses ichi ?!

J-B :
Waie ! In puque, j'crève la dalle...Mi la marche à pids, cha me...

Débora :
Dins l'frigo ! A l'tchusine.

J-B :
T'inquiète, j'connôs l'kemin !

Débora :
Bouffe nin tout qua minme ! Pinse aux grands malheurs du monde !

J-B :
(sortant dans la cuisine) J'adore tin humour !

Matthieu :
I ést d'jà vrémint ichi comme à s'majon ç'ti là !

Débora :
Waie ! Cha va ! Avinche !

Matthieu :
J'ai jomès été à l'tchusine mi..

Débora :
Oh ! Chin qu'te peûs ête casse-pids !....pardon (ils sortent salon. On sonne)

Scène 7 : J-B - Gérard - Hubert

J-B :
(venant de la cuisine grignotant un restant de pizza) Bouffe nin tout qu'elle dit ?..I a pus rin à part des morcheaux d'pizzas...d'ù qu'in a d'jà mordu n'dins ! (il ouvre..Gérard entre soutenu par Hubert, boitillant) Cha y ést ?? Elle a erpris s'vôture ?

Gérard :
Acore toudis là vous ?

J-B :
Waie ! Et si j'peûs fère inne remarque, i a pus rin ichi dins l'frigo ! (sort cuisine)

Gérard :
Tcheu culot mon'homme !..K'mint qu'in appelle eç'mollusque là qui va s'foute dins l'coquile des otes ?

Hubert :
E bernard l'ermite ?

Gérard :
Ch'ést cha ! Et bin je n'd'ai in dins m'tchusine mi...Donc ej'te dijôs, j'ai attendu qu'cheule manif elle swache fineui pou passer au d'seur du mur.

Hubert :
Mais ? I a nin inne petite porte au bout du jardin ?

Gérard :
In n'sét nin y arriver...J'ai nin acore dégagi dins é tchun. Et ch't'in sautant du mur que j'ai crotchi min pid.

Hubert :

Pourmener in peignoir d'seur el rue...dins tin quarti à l'approche des élections...In n't'a nin vu au moinsse ?

Gérard :

Si bin seur ! Minme si j'ai rasé les murs in erwétant mes pids...I n'd'a minme in qui a criei : "vous cachi après vot'bainoire, monsi Bermont ?"

Hubert :

Nin bon cha !..Nin bon du tout !

Gérard :

Et je n'sés nin si ch'est l'choc, mais in arôt dit qu'j'intindôs l'vwasse de l'ote toutoule là, Emma qui m'app'lôt !

Hubert :

Houla ! Vrémint nin bon du tout cha !..T'és seur que ch'est nin su t'tête que t'as tché ?

Gérard :

Non ! Et après tout, ch'est de t'fote ! J'cachôs après ti au jardin...In m'a inséré à l'cour...J'ai butchi, i avôt personne. D'ù qu't'êtôs ?

Hubert :

J'sus ertourné à m'majon tcheure em n'apparèl photo.

Gérard :

Te veûs fère des photos ? De tchi ?

Hubert :

J't'espliqu'rai !

Gérard :

J'va mette de l'glache d'seur min pid et après, j'va l'masser avec de l'pommade. (entrant cuisine) Et adan, Bernard ? In ést in train d's'impifrer ?

J-B :

(voix off) J'm'appelle nin Bernard !

scène 8 : Josiane - Gilles - Hubert - Gérard - Emma :

Josiane :

(vêtue d'une autre tenue) T'és pus diffichile que t'n'és bô ti ? Cha fét l'chinquième tenue que j'te moute..

Gilles :

J'ai l'souci du détail ! L'apparince !

Josiane :

J'sés waie !

Gilles :

I fôt dire que ch'est min méti ! J'sus coiffeû styliste.

Josiane :

Ah bon ? Minme les coiffeûs i font de l'politique ?

Gilles :

Bin seur ! Nous otes in sèt chin qu'cha veût dire "coper é ch'veu in quate" (riant seul) D'ailleurs si te permets, j'veûs bin t'arringi !

Josiane :
Hein ?

Gilles :
J'veûs dire arringi t'coiffure...tin maquillache !..D'ù qu'elle ést l'salle de bain ?

Josiane :
Ichi ? Mais te pinses que ch'est utile ?

Gilles :
In peut fère én essai...j'ai comme em'petite idée...(ils sortent SDB)

Gérard :
Ch'est incroyabe !..(sortant soutenu par Hubert) I a minme pos é glachon dins l'congélateû.

Hubert :
Waie ! Cha d'vint la Bérésina ichi !

J-B :
(qui suit la bouche archi pleine) Est pa queu in a i u l'pi d'l'ote a..

Gérard :
Non mais wète le !..Ch't'é hamster in puque !..I fét seur'mint ses réserves pou l'hiver !

Hubert :
In n'comprend rin à chin qu'vous dites !

J-B :
(répondant en postillonnant) Quô qu'ou ites ?

Hubert :
Avalez !..I faudrôt é paraplu pou parler aveuc mon'homme !

J-B :
J'dijôs qu'ch'est l'ote qui a eu sin pid écrabouilli pa l'vôte de cheule qui voulôt absolument parler dins min djeulophone et qu'in a invoyi jeuwer au gardin...Et i s'ont mis de l'glache ed'seur.

Gérard :
Su tchi ?

J-B :
Su sin pid !

Hubert :
Sin pid à tchi ?

J-B :
Mais j'vins d'vous l'dire !..Oh ! Vous n'avez nin fét l'univ' vous otes deûs à m'n'avisse ! Bon ! Vous m'estchusez, j'ai inne hawaïenne qui m'attind dins l'micro-onde ! (sortant cuisine)

Hubert :
I pinse qu'à mingi ! Inne vré autruche !

Gérard :
Waie ! Ch'est l'règne animal in é cop ç'ti là ? T'as compris inne séquô à ses bernètes ?

Hubert :
Non ! A part qu'i avôt inne sétchi au gardin !

Gérard :
Hubert ! va in yaut dins l'pharmacie...Ch'est dins l'tchambe d'amisse , deuzinme porte à goche ! Et déchind mi l' tube de pommade.

Hubert :
Deuzinme à goche ?

Gérard :
Waie ! L'armoire elle ést pa d'rrire el porte. (Hubert monte)

Emma :
(voix off avec porte-voix) Au s'cours ! In m'a inséré à l'cour...(Gérard se lève péniblement et va à baie vitrée qu'il ouvre)

Gérard :
Mais quô qu'vous foutez là?

Emma :
(dans son porte-voix) In m'a inséré à l'cour.

Gérard :
Ah bon ? Vous ausseui ? Décidémint !..Ch'est l'jour. Et quô qu'vous fêtes au gardin avec eç' bazar..Tout seû, quô qu'ch'est qu'vous pouvez bin dire ?

Emma :
(dans le porte-voix) N'importe quô !

Gérard :
Bon ! Donnez-mi cha ! Tcheu calamité cheule glinne !...(il lui arrache ...dans son élan elle est déséquilibrée et marche sur le pied de Gérard qui hurle)

Emma :
Oh pardon !...ch'est nin vré ! J'sus désolée !...Cha fét l'deuzinme que j'écrase aujourd'hu...Ch'est nin min jour à mi !

Gérard :
Cha arrive que ch'est vot' jour ?...L'deuzinme ?

Emma :
Waie ! Je n'd'ai écrabouilli un, t'à l'heure avec em'vôture.

Gérard :
Vous avez écrasé inne sétchi in vôtüre ?

Emma :
Non ! Sin pid ! Bougi nin, j'ai inne bonne pommade dins l'bwate à pharmacie de m'votüre.

Gérard :
Non ! Pos la peine !..Hubert i ést parti in tcheure...J'me d'minde d'ailleurs quô qu'i cafoule.

Emma :
Taratata ! Ch'est de m'fote...j'répare mes bétises...

Gérard :
Et bin ! Vous n'avez nin fineui aujourd'hu !

Emma :

Ch'tinne pommade australienne. Ch'est fét avec de l'graisse de kangourou...Après cha vous allez bondir comme inne djète .
(elle rit et sort, lui est assis avec son pied sur le bureau)

scène 9 : Gérard - Matthieu - Débora

Débora :

(sortant avec Matthieu, enlacés) T'as tout compris ach'teure ?

Matthieu :

Waie, mais i fôt m'comprinde, j'te vôs volinti...

Débora :

Justemint !..Vir volinti, ch'est ausseui accepter que l'ote i treuve sin bonheû dins chin qui l'épanouit...

Matthieu :

Et crii des bernètes dins é djeulophone avec é zazou qui..

Débora :

Matthieu, t'erkeminches ! ..Pos vré pa qu'i fôt laichi l'ote s'épanouir ?

Gérard :

Cha va !Cha va !..Te sét fort bin que t'mère elle ne fét nin de l'politique pou s'épanouir comme te dis, mais rin qu'pou m'immerder et s'ervingi d'inne séquô qui n'existe minme nin !

Matthieu :

Si j'ai é consèl à vous donner, n'jotchi nin là avec vot'pid su l'bureau...I va aller cron avec el patronne !

Gérard :

L'patronne ?...J'fés chin que j'veûs !...Ch'est min bureau !

Débora :

Ch'est not' bureau !

Gérard :

Tchi qu'ch'est ?

Débora :

Matthieu, min copain !

Gérard :

Intchanté...Vous fètes ausseui de l'politique ?

Matthieu :

Oh non ! J'ai ote cose que cha pou m'épanouir dins la vie...Vou file par eximpe !

Gérard :

Ah ch'est vous !...(à Débora) Ch'est li ?...J'vous ermercie !

Matthieu :

M'ermercii, pour quô ?

Gérard :

Grâce à vous j'ai des factures de téléphone à tchère mort !

Débora :

Laiche Matthieu !..Te vos dins certains partis politiques, i a que l'fric qui compte...J-B i ést toudis à l'tchusine ?

Gérard :

L'bernard l'ermite ? Bin seur !...Aussi lonmint que l'frigo i n's'ra nin veude !...Te vôs Matthieu, dins d's'otes partis, i a qu'la bouffe qui compte !

scène 10 : Gérard - Emma - Hubert - Nathalie

Gérard :

I in met du temps pou am'ner cheule pommade...Hubert ! Quô qu'te cafoules ?

Emma :

(venant derrière lui) J'l'ai treuvée !..

Gérard :

Ah ! Vot' fameuse pommade de kangourou !...Vous l'avez d'jà imployi ?

Emma :

Bin seur !..Cha marche !.. Et pou vous ch'est utile ! (rire bête)
Si cha marche !

Gérard :

Vous êtes seure que min pid i n'va nin tchère tout seû dins tros jours ?

Emma :

Mais non ! Fêtes mi confiinche !

Gérard :

Cha ch'est d'pus in pus diffichile !

Emma :

Allez ! Allongi vous !

Gérard:

M'allongi ? Pourquoi fère ?

Emma :

I fôt qu'vou muscle i sôt erlachi...tout mou !..Comme cha,l'pommade elle fét effet pus veute.

Gérard :

Tout mou ? Je n'va qua minme nin m'allongi à terre ?

Emma :

In monte ?

Gérard :

Pardon ??

Emma :

Vous avez bin é lit in yaut ?

Gérard :

Waie ! ..mais...non ..n on ! Nin question !..V'nez par ichi ! I a l'divan , cha f'ra l'affaire !

Emma :

Waie ! Pasqu'i a ausseui inne technique de massache
espéciale de yaut in bas...toudis de yaut in bas !..Vous virez
qu'cha f'ra du bin !...Vous s'rez tout én ote après cha !

Gérard :

(sortant dans le salon) Je n'veûs nin ête én ote !

Hubert :

(surgissant tout débraillé suivi de Nathalie) Mais infin madame
!...Ch'est nin sérieûs !...Je n'vous connôs nin mi !..

Nathalie :

(tigresse) Justemint !...Mi j'veûs fère connaissance !

Hubert :

Waie !..Mais ...infin...nin comme cha...In peût s'parler...

Nathalie :

Parler ?..Dins l'état d'ù qu'te m'as mis?

Hubert :

Mais..j'ai rin fét mi !

Nathalie :

T'as muchi dins m'tchambe, non ?...Canailou !

Hubert :

J'cachôs après l'tube de pommade...

Nathalie :

Ah !...(jouissive) Te voulôs m'fère é massache ?

Hubert :

Mais non ! Ch'étôt..

Nathalie :

Te m'as rindu folle...Te sés chin qu'ch'est inne finme
amoureuse ?

Hubert :

Euh non pasque mi...

Nathalie :

Ne m'dis nin qu't'as jomès connu inne finme ?..

Hubert :

Si...maman !

Nathalie :

In va tchangi cha !

Hubert :

Ah non...non non !..In puque in n'est nin du minme parti !..

Nathalie :

T'in fés nin...In treuv'ra bin é consensus ! (elle se lance à sa
poursuite, lui, fuit par la baie vitrée)

Scène 11 : J-B - Josiane - Gilles - et tous

J-B :

Ch'est bon ! J'm'in va ! (sort dans la cuisine)..Si te pouvôs
d'minder à t'mère de fère les courses...(reprend son porte-voix
et passant devant la baie vitrée, voit la poursuite et commente

comme une course hippique) Deûs g'voux i sont in tête...En étalon, casaque..(suivant les vêtements) suivi d'fort près par inne belle jument casaque.. L'étalon i perd des longueurs...i s'arriv'tent d'avant l'obstacle...et oh !..l'étalon i a tché..et l'jument elle a tché d'seur...(il sort) J'm'in va vir cha d'pus près !

Josiane :

Infin ! In vlà des minnires !

Gilles :

(se tenant la joue) J'sus désolé !...J'te d'minde pardon, j'étôs tell'mint pris par chin que j'fejôs, tell'mint près d'ti...que

Josiane :

Que te m'as imbrachie...Te fés cha avec tous tes cliintes ?

Gilles :

Bin seur que non !...Je n'sés nin chin qu'i m'a pris !..

Josiane :

In tout cas, j'te consèle de pus essayi ! (on entend Gérard crier)

Emma :

(voix off) Cha fét du bin, hein ? Te vôs tchan qu'i ést mou, cha va gramint mi...Et toudis du yaut in bas !

Josiane:

(ouvrant la porte) Gérard !..T'és acore inne fôs avec cheule glinne ?

Débora :

(venant de la cuisine avec Matthieu) Man ?..quô qu'i s'passe ?

Josiane :

Wète par là ! Tin père qui fét de l'politique...

Gérard :

(sortant, une jambe de son pantalon relevé, pied nu)Josiane ! Emma elle me massôt...Ch'ést pour min pid !

Emma :

Ch'ést vré...Avec de l'pommade de kangourou, toudis de yaut in bas !

Josiane :

Bin seur !..Les kangourous !..Ch'ést pou mi...sauter !

Débora :

Maman !

Matthieu :

Ch'ést la vérité madame !..I a vrémint ma à sin pid,minme qu'i l'avôt mis su l'bureau et que j'li ai dit..

Josiane :

Suffit !..Silinche !..De yaut in bas, hein ?...Mi cha s'ra de bas in yaut !..Vins Gilles ! In monte !

Gilles :

Mais infin...Josiane !?..

Josiane :

Quô ? Te n'veûs nin...C'pindant y a deûs mineutes dins l'salle de bains...

Gérard :

Josiane ! Fés nin d'bétises !..Tout cha ch'est é malintindu
(tandis qu'elle entraîne Gilles vers l'escalier le tirant par sa cravate)

Hubert :

(surgissant du jardin) Gérard !..Au s'cours !...J'in peûs pus...

Nathalie :

(surgissant) Vins min étalon !..(poursuite suivie par J-B qui commente dans le porte-voix)

J-B :

L'étalon i s'a r'mis drot..et i tcheu ses pattes ju, mais l'jument elle le lache nin..elle ervint sur li...elle ést pus foq à inne longueur...et si elle le rattrape à m'mode qu'i va in vir de tous les couleurs pasque l'jument elle ést ...

(durant cette poursuite, Débora , Gérard et Matthieu tentent de raisonner Josiane, Gilles résiste, Emma essaie de continuer à masser le pied de Gérard qui se dégage à chaque fois, et dans ce brouhaha imperceptible se ferme le

Rideau

ACTE 3

Scène 1 : Nathalie - Débora

(chacune d'un côté du bureau, elles sont chacune occupées d'arranger un bouquet aux couleurs différentes)

Nathalie :

Ch'est l'boutchét d'la victoire ?

Débora :

Je n'sés nin et j'm'in fous !

Nathalie :

Et bin, et bin !? T'in fés inne tête ! Te d'vrôs ête continte. L'votache i ést fineui, l'dépoul'mint bintôt ausseui..In sara les résultats dins inne petite heure...Tchi qui sét, t'és p'tête élue !?

Débora :

J'm'in fous que j'te dis !..Cha n'm'a rin rapporté à mi cheule campane..Au contraire, j'ai tout perdu.

Nathalie :

Fôt vir el positif..Ces 6 s'minnes, cha nous a permis d'nous connaite et d'advenir des copines !

Débora :

Bin obligi !..In vivant à 10 à longueur de s'minnes dins l'minme piche !

Nathalie :

Ah !..(déçue) Mi j'sus continte de t'avwar connue !..(Débora se rattrape en venant enlacer Nathalie)

Débora :

Mi ausseui !..J'te d'minde pardon !..Mais je n'd'ai marre de tout cha, l'politique, les élections...J'ergrète minme de m'ête lanchi là n'dins !

Nathalie :

Mi ausseui j'ai busi cha !..J'ai minme voulu m'ertirer...Te pinses, mi je n'sus qu'inne pompe..dernire de l'liste, nin inne chance d'ête élue...Et pus j'ai erwéti l'bon côté des choses..j'ai connu gramint d'gins, j'me sus fét des amisses...et j'ai minme peut-être tché d'seur l'homme de m'vie...

Débora :

Hubert ? Cha continue avec li ?

Nathalie :

A chint à l'heure, waie !..Mais j'dôs tout li apprinde ! I n'sét rin...su les finmes, bin seur !

Débora :

In tout cas, vot'cop d'foudre, cha a été...spectaculaire !

Nathalie :

Ach'teure , j'ai pus foq inne rivale !

Débora :

Ah bon ? I a inne ote finme dins s'vie ?

Nathalie :

Waie !...S'mère !..(rire des deux)

Débora :

J'sus heureuse pou ti...Mais mi, au contraire, j'ai tout perdu, m'famile et peut-être ausseui l'homme de m'vie !

Nathalie :

Matthieu ? Mais te n'l'as nin perdu !

Débora :

I a inne seminne, i m'a d'mindé d'tcheusir : li ou bin les élections...Mi j'étôs in plein n'dins, dins cheule campane...J'l'ai invoyi bouler, in disant qu'i n'pinsôt qu'à li...I ést parti in claquant l'porte...Depus i n'm'a minme nin app'lé inne seule fôs...Pire ! I n'répond nin tchan que j'l'appelle.

Nathalie :

Adan ! Ch'est p'tête nin l'homme de t'vie !

Débora :

Si ! J'me rinds compte ach'teure que minme si j'étôs élue premi minisse, sans li, m'vie elle n'arôt nin d'sins..

Nathalie :

I ést toudis temps d'arrêter.

Débora :

Et si j'sus élue ?

Nathalie :

Te peûs erfuji...In donn'ra t'plache à én ote...Cha s'fét souvint dins les partis.

Débora :

J'vas fère cha !...J'dôs li dire !..(elle prend son portable, puis se ravise)...Non !..I n'répondra nin..

Nathalie :

Pasqu'i connôt tin numéro !...Tins ! Prinds l'min (lui tend son portable)

Débora :

Ch'est que...cha va p'tête durer lonmint !

Nathalie :

Ch'est rin !..Ch't'inne carte payi pa l'parti...(Débora sort salon. On sonne, Nathalie va ouvrir)

Scène 2 : Nathalie - Hubert - Emma

Nathalie:

Miyard ! Tcheu tête ! T'és vert ! T'és passé chez les écolos ? (rire)

Hubert :

Non ! J'sus ervenu in vôteure avec elle ! Fère du saut à l'élastique ou bin du parachute dins l'Himalaya à côté d'cha, ch'est du bré d'cat !

Nathalie :

Vous avez eu én accidint ?

Emma :
Non ! Mais in l'a accapé belle ! Hein, monsi Hubert ? I n'd'a in qui m'a net erfuji l'priorité d'droite et...

Hubert :
I a nin erfuji l'priorité, ch'est vous qui avez brulé é fut rouche !...

Emma :
J'l'ai vu trop tard...Et si j'avôs freiné, cha arôt été pire..

Hubert :
Normal ! Tchan qu'in roule à 80 à l'heure dins inne zone trinte !..Chaque fos qu'elle prend é casse vitesse, in a l'sintimint d'ête dins é boeing qui décolle !

Emma :
(riant) Et boeing !..In atterrit...J'vas m'plaine à min carossi, mes amortisseûs i sont d'jà mort...I a minme nin 6 mos qu'i les a tchangis...

Hubert :
I dôt ête contint d'vous vir arriver, vot'carrossi !

Emma :
Ah cha !..I dit toudis que j'sus s'meilleure cliinte !

Nathalie :
Vous n'pinsez nin qu'à vélo ...

Emma :
Je n'sés nin rouler à vélo !..J'minque d'équilibre !...Et pus, ch'est bin tropdingereûs...Avec tous les mabouls qui rou'tent in voture

Hubert :
Si elle existôt nin , i faudrôt l'invinter cheule-lale.

Emma :
Oh ! les fleurs !..Cha m'fét pinser que j'ai oublîi cheule que vous m'aviz d'mindé d'acater à m'majon....

Hubert :
Ch'êtôt pou couronner l'évén'mint...mais, vu l'évén'mint...ch'est pus fort urgent ach'teure !

Emma :
Si !Si ! J'm'in va les tcheure !..Cha li ermont'ra l'moral !(elle sort)

Nathalie :
Et ti ? J'te sers inne séquô pou t'ermonter ?

Hubert :
E cognac, j'veûs bin !.. Minme à Walibi, j'aré jomès d's'émotions parèles !..

Nathalie :
(s'approchant féline et lui faisant des bisous dans le cou) Et attinds !..J'va t'in fère connaitte ed' s'otes mi, des émotions !

Hubert :
Nathalie ! Arrête !..Nin ichi, si in nous veyôt ?!

Nathalie:
Et après ! Tertousse i l'sét et pus in ést célibataires tous les deûs, non ?

Hubert :
Waie ! Mais nin du minme parti...Tchan qu'tout i t'ra fineui, adan, j'démissionne du MPR et j'vins au RPP ou adan ti, te vins au MPR..

Nathalie :
Mais infin, loulou, si in s'vôt volinti, quô qu'cha peût foute de tcheu parti qu'in ést ?

Hubert:
Cha met l'broule !...Erwète Josiane et Gérard !

Nathalie :
Eustes ch'ést nin l'minme...I sont marii d'pus longmint !..Ch'ést inne nouveauté dins leu vie...Nous'otes, in l'sét in k'minchant...A propos ? T'as des nouvelles ?

Hubert :
Waie ! L'dépoul'mint i ést quasimint fineui...Mais les résultats i sont d'jà clairs !..Ch'ést le RPP qui gane et aveuc inne belle avinche !

Nathalie :
Yahou !..(chantant) In a gani ...In a gani !...oh ! min pov' loulou !

Hubert :
Attinds ! Ch'ést nin tout !..Ch'ést Josiane qui ést in tête des vwasses de préférence !

Nathalie :
Ch'ést vré ? Tout cha grâce à mi !..Si je n'l'avôs nin pochi, elle n'arôt jomès fét de l'politique...T'és déçu ?

Hubert :
Inne mioche...pou Gérard waie ...mais dins l'fond, j'sus bin contint qu'tout cha i arrive au bout...D'ailleurs, in va fêter cha...C'swar, j't'invite à mingi !

Nathalie :
Au...au restaurant, à deûs ?

Hubert :
Non !..Maman elle nous prépare é bon cassoulet !

Nathalie :
Ah !..

Hubert :
Quô ? Cha n'te fés nin pléji ?

Nathalie :
(peu emballée) Si..si..Mais ...j'aime nin trop l'cassoulet...

Hubert :
Ah !

Nathalie :
Te sés, min rêve ch'ést é p'tit resto italien...et mingi inne pizza.

Hubert :
Inne pizza ?..A côté du cassoulet d'maman ?...Infin ! J'm'in otchuppe !

Nathalie :
T'és é chou min loulou...Et te mérites inne récompense...au jardin in s'ra trintchile...(elle le fait reculer féline, lui hésitant)

Hubert :
Non !..Nathalie !..ch'est nin l'momint...Ch'est acore el dépoul'mint !...

Nathalie :
Et bin justemint !...

Hubert :
Mais...mais..déyors, i fét nin trop côd eç'swar et...

Nathalie :
T'in fés nin !...J'vas t'récauffer...(ils sortent par la baie vitrée)

Scène 3 : Gilles-Josiane- Gérard-Nathalie - Hubert

Gilles :
(entrant fond avec Josiane) Te t'rinds compte ? 41 pourchints des vwasses pou le RPP...Ch' ést é record !

Josiane :
Ch'ést vré qu'ch'ést incroyabe ! Mais ch'ést ach'teure que l'pus dur i resse à fère...In va d'vwar tenir nou promesses !

Gilles :
Waie !...Infin, non !..El pus dur i ést fét !...In ést élu....pou les promesses, in f'ra chin qu'in peût !

Josiane :
Quô ? In dôt mette in route not'programme de campane !

Gilles :
D'accord, mais ch'éôt inne campane, justemint !...In n'attire nin les moukes aveuc du vinèke !

Josiane :
Te veûs dire qu'in leu a raconté des carabistoules ? Qu'in ést des minteûs ?

Gilles :
Non !..Bin seur que non !...Tout chin qu'in a promis in l'pinsôt vrémint, mais ach'teure que ch'ést nou otes qui mène el gevau, in va s'rinde compte que tout i ést nin possibe !

Josiane :
Adan, tout chin qu'in erprochôt à l'incienne majorité, in n'sara nin l'tchangi ?

Gilles :
Nin tout, non !...Presque rin d'ailleurs !

Josiane :
Mais adan, eustes non pus i n'arot'tent nin su l'fère ?

Gilles :
Bin seur que non !

Josiane :
Mais ch'est honteûs ! Adan , in les crititchôt in sachant qu'i n'pouvot'tent rin fère ?!

Gilles :
Ch'est cha l'politique, Josiane !..L'opposition elle démolit toudis ceûs qui sont au pouvoir, in dijant qu'ch'est des incapabes pou prinde leu plache...Mais inne fôs qu'i sont à leu plache, i font jusse l'minme que les otes !

Josiane :
Hé bin !..J'sus déçue !

Gilles :
Attinds !..J'ai nin dit qu'in n'allôt rin fère, j'ai dit qu'in allôt fère chin qu'in peût...Nous otes ausseui in d'ara, d'l'opposition...

Josiane :
Mi, j'vas fère tout chin que j'peûs, compte seur mi !

Gilles :
J'in sus seur, j'te connôs bin ach'teure !...Et comme avec tin score de vwasses de préférence te s'ra bourgemète !

Josiane :
Te pines que j'saré ?

Gilles :
Mais waie !..T'aras inne équipe autour de ti et avec nou pourcintache, i suffit d'inne alliance et in ara l'majorité au consèl communal !

Josiane :
Inne alliance ???! J'pinse à Gérard tout d'é cop !..I dôt ête su l'tchul !

Gilles :
Ah cha !..Avec leu 11 pourchints !..I n'font nin l'pwasse !..Ermarque vlà é parti avec tchi...

Josiane :
Non !..Que mi j'sus bourgemète, i n'va nin s'in r'mète !

Gilles :
Mais si !..L'politique, ch'est comme le sport i fôt apprinde à perde !..Bon ! J'te rappelle qu'in a l'rèception au parti dins inne heure...pou la fiesta !..Adan, va t'tchangi...Te mets inne séquô qui...

Josiane :
Ah non !..Te n'vas nin erkeminchi à t'prinde pou Cocochanel ! J'va mette chin que j'veûs !..Hé ! J'te rappelle que ch'est mi l'bourgemète...Ch'est mi qui comminde, vu (elle sort chambre)

Gilles :
Ok ! J'me sers inne séquô à bware , te permets ?

Josiane :
(voix off) Waie ! Mais n'bôs nin trop !..Pinse à l'imache du parti (rire, Gilles se sert, Nathalie entre)

Nathalie :
Waie ! In a gani, in a gani !..(elle se jette au cou de Gilles) Et cha, pasque t'as eu inne bonne pompe, pos vré ?

Gilles :
Mais absolument !..Les 41 pourchints, ch't'à tout l'équipe qu'in les dôt !

Nathalie :
41 pourchints ? Miyard ! Ch't'é triomphe !.(Hubert entre, un peu débraillé)

Gilles :
Waie !..Par conte pou d's'otes, ch'est la catastrophe !..Ch'est Waterloo morne plaine !..Mes condoléances monsi Carbeau !

Nathalie:
N't in fès nin, j'étôs justemint in train d'li ermonter sin moral !

Gilles :
Et i n'd'a b'son à vir es'n'allure...min pov' monsi Carbeau.

Nathalie :
Ah non ! Cha ch'est l'émotion...pasqu'i n'est nin habitué à ...!..Ch'est comme in qui prind l'avion pou l'première fôs, mais cha vindra fés mi confiinche !

Gilles :
Ah ! Compris !..Et j'me doute que te dôs ête é bon prof !..Te m'as d'jà donné é cours, te t'rappelle pus ?...(rire des deux)
Toutes mes félicitations monsi Carbeau !

Nathalie :
Les condoléances, et 10 s'condes après les félicitations...et avec el tête pou l'dire !..T'és é vré politicien...Gilou (Gilles éclate de rire) Josiane d'ù qu'elle est ?

Gilles :
In yaut !..Elle se tchange pou l'cocktail de la victoire...Mais ti ausseui Nathalie te vindras ?

Nathalie :
Je n'pinse nin non !..

Gilles :
Oh !..Si ! J'insiste !..In dôt trinquer insonne pou la victoire !

Nathalie :
J'ai mis du tchampane au frais à l'tchusine...In trinqu'ra ichi !..Mi ç'swar ...j'sus invité au resto !

Gilles :
Ah !..(regardant Hubert) D'accord !..Te donnes ausseui des cours du swar !..

Nathalie :
(criant en sortant) Jojo !..(cri hystériques de joie des deux voix off)

Gilles :
Vous avez intindu les résultats définitifs ?..

Hubert :
Non !..Et j'm'in fous !..

Gilles:

Ah ! L'amour !....J'veûs qua minme vous dire que le MPR i a ramassé 11 pourchints des vwasses !...Ch'est é fort beau score tchan qu'in vôt l'programme proposé...et les gins qui avôt d'seur vou liste !

Hubert :

Cha n'vous suffit nin d'gani ?..I fôt acore infonchi les otes inne mioche in puque ?

Gilles :

Non !...J'essaie d'esplitchi pourquô qu'in a eu 41 pourchints des vwasses au RPP..

Hubert :

41 pourchints ?..Aveuc é programme parèle et vou d'seur la liste ?..Cha prouve que les gins i sont aveules ou bin cons !

Gilles :

Réaction épidermique naturelle in fache de la défaite !...Normal !Vous m'fêtes pinsez aux jeuweûs d'football...Ceûs d'l'équipe qui perd i l'mette toudis su l'dos d'l'arbite !..Si vous permettez, j'vas m'rafraichir inne mioche...in fête la victoire eç'swar !..(il sort SDB)

Hubert :

Ch'est cha ! Va t'in t'noyi !

Scène 4 : Hubert - Gérard - J-B

J-B :

(entrant avec Gérard) Super sympa d'm'avwar ram'né ichi in voture !

Gérard :

(très abattu) Ch'est rin d'cha !..L'défaite cha crée des liens (ils tombent dans les bras l'un de l'autre, Gérard sanglotant) 11 pourchints !...Te t'rinds compte ?

J-B :

1 pourchint, te t'rinds compte ?..(fier)

Hubert :

Infin, inne mioche de dignité..Ch'est dins la défaite qu'in erconnôt les grands !

Gérard :

(se calmant) T'as réjon, Hubert !...Vaincu mais dignes !

J-B :

Waie ! In l'a dins l'...(montrant ses fesses) mais in ést dignes ! (cette fois c'est Hubert et Gérard qui tombent dans les bras l'un de l'autre en sanglotant)

Gérard :

11 pourchints !...11 pourchints !..

Hubert :
Ch'est mi qu'rin...mais ch'est nin gramint !

J-B :
(rassurant) Et mi quô que j'dôs dire : 1 pourchint !...Ch'est moinsse que rin...et j'sus contint ! (il se joint aux deux)

Gérard :
Te sés l'pire ?..Josiane ...Ch'est elle qui a l'puque de vwasses de préférence...donc !

Hubert :
Elle...elle ést bourgemète ??

Gérard :
Waie !...ch'est inne finme...et l'minne in puque qui va tout diriger !

Hubert :
Mi j'sus habitué ...aveuc maman !

J-B :
Vous savez quô ?

Les deux :
Non !

J-B :
Mi j'crève la dalle !...J'aval'rôs la capitale !

Gérard :
I a vrémint rin qui t'cope l'appétit, hein ?...In vint d'prinde inne tatoule aux élections et cha t'ouvère l'appétit ?

J-B :
In n'va qua minme nin fère el grève de la fogn pasqu'in n'est nin élu ?

Gérard :
J'ai nin dit cha !..Mais mi, pou l'momint, j'ai é noeud dins m'n'estomac ! Je n'saré rin avaler !

J-B :
I fôt inne goutte d'hule pou l'déserrer...J'vous sers é verre...(il va au bar et sert trois verres qu'il vient leur donner)

Hubert :
Et ti au fèt t'as fèt é beau score personnel ?

Gérard :
Waie ! Je n'dôs nin m'plaine ! J'sus l'deuzinme meilleur score du MPR , derrire Chavanel !

Hubert :
Donc, te s'ras seur'mint conseilli communal, et tchi qui sét avec les alliances...

Gérard :
Ah non ! Ne m'parle nin d'alliance !..Cha m'fét pinser à Josiane...Nou ménache i ést bintôt in l'air, je n'va nin fère alliance avec elle au consèl communal !

J-B :
Vous savez chin qu'in d'vrôt fère ?

Les deux :

Non !

J-B :

Aller vir dins l'frigo si y a nin inne bricole à mingi qui trandèle...in attendant l'souper !

Gérard :

Te m'énerves à la fin ! Quô qu'i a là n'dins ? (lui tape sur le ventre) Rin qu'é grand système digestif ?

J-B :

Bin waie ! comme tout l'monde !

Gérard :

Non ! Monsi !..I t'minque inne séquô !...E tchoeur !..Adan va t'in par là. Minge tout chin qu'te treuves !...Avalé el frigo si te veûs, mais fous-mi la paix !

J-B :

(à Hubert qui l'invite à aller dans la cuisine) Bin quô qu'j'ai dit d'ma ?

Hubert :

Rin ! I ést fort énervé ...l'déception ...fôt l'comprinde !

J-B :

In puque j'veûs rin dire, mais i ést nin doué in anatomie...L'tchoeur cha n'fét nin partie du système digestif ! (il sort cuisine)

scène 5 : Hubert - Gérard - Débora - J-B - Gilles

Débora :

(sortant du salon) Salut pa !..(guillerette) Cha va ?

Gérard :

A mervèle ! Et ti ?

Débora :

Oh mi !..Ch'ést ...formidabe. J'sus heureuse...Matthieu i m'vôt volinti. I vint d'me l'dire et i arrive ichi .

Gérard :

Oh bin tins ! Puque in ést d'fous !

Débora :

Quô qu'i a min p'tit papa ?...Ah ! Ch'ést vré !...Ch'ést les élections ? Les résultats i n'sont nin bons ?

Hubert :

Nin terrible, non !...11 pourchints !..

Débora :

Et nous otes ?

Hubert :

1 pourchint !

Débora :

Tant mi ! Comme cha ch'ést réglé !..Et maman ?

Gérard :
Ta mère elle a cartonné !..Ta mère elle va d'venir bourgemète !..

Débora :
Ch'est vré ? Mais ch'est super cha !

Gérard :
Super ? Si te l'dis !

Débora :
Infin papa !..Tcheul honneû...Et pus pou m'treuver é boulôt, cha s'ra seur'mint pus fachile ach'teure.

Gérard :
T'intinds cha Hubert !...Vlà pourquô les gins i s'ont inne mache idée de l'politique. In n'est nin élu pou fère pléji à s'famille ou pou donner des avintaches à ses amisses !..

Débora :
Quô ? Donc, si t'avôs été élu à l'plache de maman, te n'm'arôs nin assisté pou treuver du boulot ?

Hubert :
Non ! Chin qu'Gérard i veût dire ch'est que...

Débora :
Couchi l' toutou à sa mémère !...Non ! Chin qu'i t'reste là, ch'est qu'inne finme...et l'tinne in puque..elle t'a battu à plates coutures...Matcho !

Hubert :
Ah non ! Vous n'pouvez nin dire cha...

Débora :
J'ai di couchi !...Combin d'pourchints ?

Hubert :
11

Débora :
Ch't'acore gramint d'trop pou é balochard comme ti !

Gérard :
Balochard ? Mi ?..Débora fés attintion à chin qu'te dis !

Débora :
Ch'est ti qui a k'minchi tout cha !...Ch'est ti qui nous a lanchi dins l'politique.

Gérard :
Mais je n'vous ai jomès d'mindé de m'suve !

Débora :
Te n'veyôs pus rin d'ote que t'n'élection...Résultat : t'as perdu t'finme, t'as foutu t'famille in l'air. E consèl : fés comme mi : laiche tchère tout cha et fés remonter tin score auprès de t'finme...(elle sort entrée principale)

Gérard :
Dis-mi Hubert ? J'ai inne tête à claques ?

Hubert :
Non ! Pourquô qu'te m'demindes cha ?

Gérard :
Pasque depuis inne heure, j'arrête nin d'in prinde !

J-B :
(venant de la cuisine avec un plat de toasts et une bouteille de champagne. Il baragouine en machonnant) Ch'est super ! I a des toasts...Et i sont bons !..I a ausseui du champane ! Cha a du bon les élections, cha rimplit l'frigo.

Hubert :
Infin ! Vous n'êtes nin gêné vous !

Gérard :
Te vôs !..I a rin d'tchangi dins not' monde...Panem et circenses...du pogn et des jeux...quô que l'peuple i veût d'puque !

J-B :
Allez ! J'l'ouvère !

Hubert :
In bôt du champane tchan qu'in fête én évén'mint !

J-B :
Ah bon ? Mi j'bôs du champane pasque ch'est bon !..Perdez é toast !..I a minme du crabe !..(Hubert tend l'assiette à Gérard, qui refuse pendant que J-B remplit des coupes)

Gérard :
In dirôt qu'vous vous in foutez d'avwar pris inne dég'lée au votache ?

J-B :
(mâchant désinvolte) Ah ! Non !....mais.....infin...Waie ! Si j'm'in fous !

Hubert :
Mais adan ? Pourquoi fère inne liste et vou lanchi dins l'politique ?

J-B :
Pou vir chin qu'ch'étôt !..Mais ch'est les gins qui décid'tent...I n'veut'tent nin d'nous otes, tant pis pou eustes !

Gérard :
Tant pis pour eustes?...que vous n'êtes nin élu ??...Ah vous avez vrémint l'moral vous !

J-B :
Bin seur ! In erkeminch'ra l'fôs qui vint !

Hubert :
Quô ?...Vous allez ermète cha aux prochaines élections ?

J-B :
Bin waie ! ..D'ichi là, les gins i s'aront p'tête réfléchi !

Gérard :
Sans indiscretion, ti...pardon vous..

J-B :
Non ! Te peûs dire ti...min frère...

Gérard :
Ah waie ! Adan, ti , min frère, t'as eu combin d'vwasse de préférence ?

J-B :
Zéro !

Hubert :
Kemint zéro ?

J-B :
Bin waie !..I a personne qui a voté pou mi !

Gérard :
Minme nin ti ?

J-B :
Ah non !...Cha fêt prétintieûs de voter pou sô-minme !...Ch'est l'air de dire à tertousse qu'in ést seur d'ête el meilleû !

Hubert :
Mais infin ! I a personne qui sarôt qu'ch'est ti qui a voté pou ti, vu que l'vote i ést secret !

J-B :
Ah ch't'acore vré cha !...Merde ! J'avôs nin busii à cha ! Ch't'ra pou l'fôs qui vint...Bon ! Mais in parle, in parle et l'plat i ést d'jà veude !...Bougi nin, i n'd'a d's'otes ! (sort cuisine)

Gérard :
J'ai d'jà vu des spécimens, mais adan li, ch't'inne catégorie à part !..(Gilles sort SDB)

Hubert :
Tins ! In vlà én ote des spécimens !

Gilles :
Oh ! Monsi Bermont !..J'tins à vous féliciter pou l'beau score du MPR et surtout pou vou score personnel !

Gérard :
Cha va ! Pôs la peine d'user vot'salive !

Gilles :
Mais j'vôs qu'minme inne défaite cha s'fète ?...Champane ?

Hubert :
Nous otes in bôt du champane pasque ch'est bon !

Gérard :
Parfait'mint !..et in mingé des toasts !..(de colère il enfourne un toast)..Ach'teure vous m'estchusez, mais j'voudrôs pouvwâr ête au calme é momint ! (se dirige vers le salon) Ch'est nin qu'vot'compagnie elle me déringe (très gracieux)...in fêt, te m'immerde (plat)

Gilles :
Ch'est normal...Réaction épidermique après la défaite !

Gérard :
Te vins Hubert ?

Hubert :

Non ! J'm'in va feume inne chigarette d'seur el trottoir...Emma elle dôt arriver.

Gérard :

Em'finme ausseui elle arôt pouvu s'app'ler Emma...

Hubert :

Ah bon ?

Gérard :

Waie ! Pasqu' "emma" bin eu ! (sort salon)

Gilles :

(riant) Ch'est grand l'humour dins la défaite !..(regard noir d'Hubert qui sort croisant Débora et Matthieu)

scène 6 : Gilles - Débora - Matthieu - J-B - Nathalie - Josiane

Débora :

(entre tenant Matthieu..ils s'enlacent .."sur une autre planète")
Matthieu...Depus tchinze jours je n'vis pus..

Matthieu :

Mi non pus !...J'sus é vré zombie...Je n'vos pus rin...j'n'intinds
pus rin...

Débora :

J'ai bin pinsé que j't'avôs perdu pou toudis !

Matthieu :

J'pinsôs à ti à chaque mineute...du matin au swar !

Débora :

J'ai essayi d't'app'ler 10 fôs par jour..te n'répondôs nin ...

Matthieu :

J't'avôs mis dins mes numérôs filtrés...j'étôs jalous..

Débora :

J'te d'minde pardon...J'ai vrémint été inne égoïsse !

Matthieu :

Mais non ! Ch'est mi..J'erefujôs d'admète que te pouvôs
t'intéresser à ote cose que mi...(Débora voit soudain Gilles qui
est tout ouïe)

Débora :

Inne seconde !...(à Gilles) Vous avez inne carte VIP vous pou
ête là au premi rang ?

Gilles :

Pardon ?

Débora :

Ch'est nin é spectacle, ni é meeting j'vous signale...Ch'est
m'vie privée qu'vous êtes in train d'erluquer !...Déyors !

Gilles :

Mais j'attinds vot'mère qui..

Débora :

J'ai dit : déyors !

Gilles :
Bon ! Et bin j'm'in va feumer inne chigarette avec monsi Carbeau !

Débora :
Ch'est cha ! (il sort)

Matthieu :
(applaudissant) Tcheule autorité !...T'és toudis comme cha avec les hommes ?

Débora :
Cha dépend...tcheul homme que j'ai in fache de mi...

Matthieu :
Et avec mi par eximpe, te saras ête aussi autoritaire ?

Débora :
Non !..Pasque ti...Ti t'és é cas à part !...t'és unique...(ils se sont enlacés) Et tout chin que j'veûs t'donner ch'est (prêts à s'embrasser)

J-B :
(sortant de la cuisine) E p'tit toast à l'mousse de canard !...In n'a nin acore goûté à ceûs-là.

Matthieu :
I habite dins tin frigo, ch'est nin pôssibe cha..Chaque fôis que j'vins ichi, i vude de l'tchusine.

J-B :
Dins mes bras ma soeur !...Te permets, min frère ? Tins-mi cha (il lui donne l'assiette de toasts et la bouteille de champagne) Débo !..(il la serre contre lui) Félicitations...T'és l'meilleure !...Tcheu bonne idée qu'j'ai eu de t'prinde avec nous otes !

Débora :
Arrête J-B ! Te m'étouffes !...Et pus, te sins l'pâté !

J-B :
Normal ! (reprenant l'assiette et la bouteille) J'ai goûté d'avant d'servir...merci min frère.

Matthieu :
Félicitations pour quô ?

J-B :
T'habites d'seur inne ote planète min frère ?..Je l'félicite pou sin score aux élections...Ch'est elle qui a eu l'puque de vwasses de not' parti AMD...

Matthieu :
Ah waie ! AMD ..amis de l'mousse de canard ? (il rit)

J-B :
J'aime bin tin humour...Vous allez bin insonne pou cha !...Allez ! J'm'in va vous tcheure deûs p'tites copettes !...In va fêter cha ! (sort cuisine)

Matthieu : Te n'm'avôs nin dit qu't'avôs cartonné aux élections ?

Débora : Te n'me l'as nin d'mindé !

Matthieu : Ch'est vré ! pardon !

Débora : Et pus, cartonner !..Ch'est é grand mot !..Not' parti i a eu 1 pourchint des vwasses adan !

Matthieu : Cha n'veût rin dire...I a des alliances in politique !

Débora : Tout cha n'm'intéresse pus !..Tout chin que j'voulôs, ch'étôt inne vwasse...el tinne qui m'dijôt qu'te m'veyôs volinti...Et tout chin que j'voulôs, ch'étôt...(ils sont de nouveau prêts à s'embrasser)

J-B : Deûs p'tites copettes !(apporte un verre à chacun)

Débora : T'és ginti J-B, mais tout duch'mint te k'minches à ...

J-B : Cha y ést !..(riant) J'ai oublîi l'boutèle et les toasts !..(sort)

Matthieu : (dubitatif)...el monde de d'mogne !...Eh bin !?

Josiane : Et si i n'est nin contint, ch'est l'minme prix !

Débora : (courant dans ses bras) Maman ! Chin que j'sus heureuse pour ti !..

Josiane : Merci Débora ! T'és ginti ! Ch'est l'premi mimbe de m'famile qui m'félicite !

Débora : T'as nin acore vu papa ?

Josiane : Non! Et cha m'inquiète.

Débora : Matthieu ! Te n'félicites nin maman ?...Ch'est elle qui a fét l'pus gros score...Elle va ête bourgemète !

Matthieu : Je n'savôs nin !..toutes mes félicitations...Si vous permettez (il l'embrasse)

Josiane : Merci !

Matthieu : Débora ausseui elle a fét é bon score...Infin, pour sin parti elle ést in tête !

Josiane :
Je l'sés ! Bravo ma chérie ! (embrassade)

Nathalie :
Bravo Débora ! Minme si j'sés qu'ch'est nin fort important pour ti !...T'oublies nin min GSM ?

Débora :
Oh ! Ch'est vré !..Tins ! Merci !...I a été fort utile !

Nathalie :
(regardant Matthieu) J'vôs cha, waie ! tant mi !

Matthieu :
Justemint madame el bourgemète, j'dijôs à Débora que minme dins é p'tit parti, elle peût toudis espérer inne plache au consèl communal...et tchi qui sèt puque peut-être...les alliances, ch'est nin fêt pou les tchins !

Josiane :
Non bin seur !..Mais infin pou l'momint...

Débora :
Matthieu ? quô qu'i t'prind ? De quô j'me mêle ? Est-ce que j't'ai d'mindé..

J-B :
Vlà l'boutèle et les toasts !..

Josiane :
Du tchampane ?..

J-B :
Ch'est nin vré !...I a acore deûs coulons in puque su l'trappe ?..Allez ! Deûs verres in puque !..(à Nathalie) Tins cha pour mi deûs s'condes, ma soeur ! (lui donne la bouteille et les toasts)

Nathalie :
Mais ...mais ch'est min champane !...Et mes toasts !..

J-B :
Eh bin bravo ! I sont succulents ! Vous avez du goût ! (sort cuisine)

Josiane :
D'ù qu'i ést Gilles, pasqu'in dôt y aller !

Débora :
Déyors ! I feume !

Josiane :
Te veûs l'app'ler Nathalie ? Dis-li que j'sus prête !..(Gérard sort du salon)

scène 7 : Josiane - Gérard - J-B

Débora :
Matthieu !..Vins au jardin !...J'ai deûs mots à t'dire !..

Matthieu :
Non ! Attinds, j'voudrôs acore d'minder à t'mère...

Débora :
(sèche) Vins que j'te dis !..(il obéit penaud)

Gérard :
(après un silence gêné des deux) Je te...Je vous félicite...madame la bourgemète !..(il vient lui tendre la main, ce qu'il font maladroitement)

Josiane :
Merci...Gérard !...J'sus désolée que..

Gérard:
Mais non t'és nin désolée ! T'as eu chin qu'te voulôs !...m'humilier ! Ch'est fét !

Josiane :
Non ! J'ai jomès voulu t'humilier...Au début je n'dis nin, j'ai fét cha par esprit d'vengeance, mais..

Gérard :
Mais ach'teure que te sés tchi qu'ch'est Emma...T'erconnôs qu't'as bleu vu, mais ç'pindant t'as continué !?

Josiane :
Waie ! J'l'erconnôs !...J'me sus pris au jeu !

Gérard :
Au jeu ?? Et bin t'a gani ! et j'ai perdu !

Josiane :
In a perdu tous les deûs Gérard !...Not' couple !?..

Gérard :
Not' couple ?? Depus six s'minnes i m'sonne que te l'as bin oublii not' couple !..

Josiane :
Pasque ti t'y as pinsé peut-être ?

Gérard :
D'avant, l'politique cha t'passôs au d'seur de l'tête bin pus yaut qu'les satellites dins l'espace...Et tout d'é cop, te d'vins politicienne ?

Josiane :
L'fote à tchi ? Tchi qui nous a lanchi là n'dins ?

Gérard :
Ch'est nin vré !..Ch't'é complot aveuc et'file ? Et si j'me fous dins canal, te vas m'suve ?

Josiane :
Seur'mint nin, non !... Pasque tin r'gard i m'dit qu'te voudrôs m'noyi !

Gérard :
Mi j'voulos simplemint...

J-B :
Deûs verres pou les nouveaux coulons !

Gérard :
Déyors !..(il fait 1/2 tour emportant bouteille et toasts) Mi j'voulôs fère de l'politique pasque j'avôs des idées...

Josiane :
I fôt crware qu'in n'in veût nin d'tes idées, pasque ch'est mi qu'les gins i ont tcheusi !

Gérard :
Les gins i sont bêtes !

Josiane :
Mi ausseui j'ai été bête !...Bête de viv' trinte ans à côté d'en homme in busiant qu'i m'veyôt volinti ! (on sonne)

scène 8 : Josiane-Gérard - Gilles - Hubert - Emma

Josiane :
(allant ouvrir) Monsi i peût tout fère !...Mi j'dôs rester à m'plache, ch'est cha ? T'és vrémint égoïsse et borné !

Gilles :
(entrant en riant) Cha ch'est la meilleure !

Hubert :
(entre parlant vers l'extérieur) Infin ! J'vous avôs d'mindé des fleurs pou couronner l'évén'mint !...(Emma entre avec une couronne mortuaire portant une banderolle : "à notre ami Gérard") Nin inne couronne mortuaire !

Emma :
J'ai mal compris, vlà tout !

Josiane :
Mais non ! ...Ch'est tout jusse !..(prend la couronne et la flanque autour du cou de Gérard) In vint d'interrer not' couple !..(elle sort suivi de Gilles toujours hilare)

Emma :
Donc ? J'ai bin fét final'mint !?

Gérard :
(prêt à exploser) Waie ! Vous avez bin fét ! J'va l'mette d'seur vou tombe inne fôs que j'vous aré étronné...

Hubert :
Gérard ! Calme-tô !

Gérard :
J'va jusse tchangi l'band'rolle et martchi : "à inne balouse qu'in n'ergrett'ra nin "

Emma :
(éclatant en sanglot) Mi j'fés tout chin que j'peûs !

Gérard :
Et bin ! Arrêtez !..Vous n'd'avez fét asseui !

Emma :
In puque, ch'est nin beau de s'motchi des morts !

J-B :
Oh !...Ch't'é déjeuner d'interr'mint ? J'ai acore inne paire de toasts et du champane, mais j'n'ai nin d'sandwiches et de l'soupe !...(à Emma) Ch'étôt inne sétchi d'proche ?

Emma :
Waie ! Ch'est mi ! (elle éclate de plus belle)

J-B :
Ah ! Tous mes condoléances...(éclate de rire voyant Gérard)
Ch'est nin là qu'in met cha min frère !

Gérard :
Hubert ! Te veûs fère évacuer l'piche...j'ai b'son d'ête tout seû ..

Hubert :
Vous avez intindu ? A l'tchusine, monsi Bermont i veût ête tout seû !

J-B :
A Tahiti in met des fleurs autour du cou des gins, mais ch'est nin des comme cha !

Emma :
Monsi Gérard ! Si j'peûs fère inne séquô pou vou ! (regard noir de Gérard...Emma éclate en sanglots)

Hubert :
Emma !...(elle sort obéissante)

J-B :
Vins bware é cop ma soeur, cha t'f'ra du bin ! (ils sortent)

Hubert :
J'te sers inne séquô à bware ?

Gérard :
Non merci !..

Hubert :
J'peûs fère inne séquô?

Gérard :
Non ! Cha va !..

Hubert :
J'sus déyors...Y a Nathalie et...

Gérard :
Waie ! Vas-y..!(Hubert sort)

scène 9 : Gérard - Débora- Matthieu

Débora :
(venant du jardin avec Matthieu) Ch'est à mi d'décider non ?..T'as rin à vir là n'dins !

Matthieu :
Kemint j'ai rin à vir ? J'm'intéresse à ta vie, ch'est normal non ?

Débora :
Te t'intéresses ?..Te veûs m'imposer tes décisions, waie ! Tchan que j'me sus lanchi dins la politique, t'étôs contre...Te m'as laichi tchère..

Matthieu :
Je n't'ai nin laichi tchère...T'étôs otchuppée et..

Débora :

Eh ! Oh !..Te m'as qua minme mis dins tes numéros filtrés, t'as oublii ? Ach'teure, j'veûs tout arrêter et cha n'te va nin non pus !..Ch'est nin possible cha, hein !?

Matthieu :

T'as réjon, ch'est nin possible d'être aussi borné qu'ti !

Débora :

Mi ? Mi j'sus borné !..Ok !..Et bin tins ! (elle prend la couronne et la flanque autour du cou de Matthieu) Alea jacta est...Et ite missa est...Amen ! (elle sort vers les chambres)

Matthieu :

Débora ! Attinds ...

Gérard :

Pos la peine ! Elle acout'ra nin !...I fôt attinde !

Matthieu :

Ah bon ! Vous la connaichi bin !

Gérard :

Oh ! Ch'est tout l'caractère de s'mère !..Ch'est comme tchan qu't'ouvère é bon vin ou inne bonne bire et qu't'as escoué l'boutèle, i fôt l'laichi posé é momint pour ersatchi l'amertume, ou pour nin tout attraper dins t'fidjure !

Matthieu :

Ch't'à vous cha j'pinse !... J'vous la rinds !...Et vous ? avec vot'finme ?

Gérard :

(montrant la couronne) Ch'étôt sin cadeau !

Matthieu :

Ah ! J'comprinds!

Gérard :

In ést tous les deûs dins l'minme cas final'mint ! In n'voulôt nin qu'elles fèchent de l'politique...

Matthieu :

L'différinche ch'est qu'mi, ach'teure j'voudrôs qu'elle continue ...tandis qu'vous..

Gérard :

Ah non !...Je n'veûs nin qu'elle arrête...Elle ést bourgemète, elle a eu gramint d'vwasses et elle...elle...waie ! T'as réjon !..Ch'est cha que j'voudrôs au fond d'mi !

Matthieu :

Donc ! Débora elle a réjon !..In veût tous les deûs qu'elles fèchent chin qu'in a décidé ?! (Josiane entre fond)

scène 10 : Gérard - Matthieu - Josiane

Josiane :

Gérard ! ..Est-ce qu'in pourrôt s'parler...in tête à tête ?

Matthieu :

Oh ! In dirôt qu'vot'boutèle elle a posé asseui lonmint ?...

Gérard : Waie ! Ach'teure, attintion de nin erkeminchi à l'escouer !

Matthieu : Vous pinsez que l'boutèle in yaut..infin j'veûs dire Débora elle...

Gérard : Ch'est deûs minmes que j'te dis !

Josiane : Bon ! Ch'est fineui les muchotes, waie !? Si vous voulez bin nou laichi, jone homme !

Matthieu : Bin seur madame !..(il sort chambre)

Josiane : D'ù qu'i va ?

Gérard : In yaut !

Josiane : Merci !..J'ai bin vu qu'i n'déchindôt nin à l'cave !..Mais quô qu'i va fère in yaut...Ch'est nin é moulin cheule majon ?

Gérard : I va ertreuver Débora !

Josiane : Ah !..Ch'est ermis intre eustes ?

Gérard : J'pinse !..I sont su l'bonne route in tout cas !...A propos, ti, t'étôs nin in route pour l'rèception d'la victoire ?

Josiane : Si !..Mais j'ai d'mindé à Gilles de fère demi-tour et de m'ram'ner ichi...je n'va nin !

Gérard : Kemint te n'vas nin !? Te dôs aller !..Ch'est ti l'grande gagnante et..

Josiane : Non ! Je n'va nin pasque j'ai bin réfléchi et j'me sus aperçu qu'in acceptant d'ête bourgemète, j'allôs briji d'masses d'affères dins m'vie...à k'minchi par not'couple...

Gérard: Mais non !..Tout y ést de m'fote : j'étôs jalous de t'rèussite, et mi ausseui j'ai réfléchi...Te dôs fère chin qu'te décides !

Josiane: Et bin justemint j'ai décidé de tout arrêter et d'erprinde em'vie normale !

Gérard : Non ! Te fés cha à cose de mi...Te vas sacrificii t'carrire personnelle pasque j't'impose mes décisions !.

Josiane : Mais non ! J'arrête pasque mi j'ai décidé que m'vie ch'étôt nin la politique ...que j'ai d's'otes priorités...

Gérard :
Non ! Te n'peûs nin laichi tchère comme cha !

Josiane :
Infin, j'fés chin que j'veûs ! I a inne heure te m'fejôs la djeule pasque j'étôs élue...Ach'teure te m'indjeules pasque j'veûs arrêter ...Faudrôt savwar !

Gérard :
T'as réjon !...Estchuse-mi !..(il l'enlace) In n'peût nin ête heureûs in f'jant inne séquô à contre tchoeur...

Josiane :
Mi, tout chin qu'min tchoeur i veût...ch'est vive...ichi..aveuc ti !..

Gérard :
N'impêche...ête bourgemète...

Josiane :
Gérard ! T'erkeminches ?

Débora :
Maman ? Papa !...Ch'est bon d'vous ertreuver...infin à deûs ! Et cha tché bin, Matthieu i a inne grande nouvelle à annonchi !...Allez ! Vas-y !

Matthieu :
Et bin vlà !...Débora elle arrête el politique !

Josiane :
Et in mi ausseui !

Gérard :
(bas à Matthieu) Quô que j'te dijôs ? Deûs minmes !

Débora :
Maman ?..Ch'est vré ? Te n'vas nin ête bourgemète ?

Gérard:
Et bin non ...Elle a décidé..

Josiane :
IN a décidé qu'ch't'rôt mi comme cha !

Débora :
Mais ch'est nin cha qu'te d'vôs annonchi !..Matthieu et mi in va s'installer insonne !

Gérard :
Quô ?..Mais k'mint qu'vous allez fère ?..T'as nin d'boulot ...et li ?

Matthieu :
In va s'installer insonne...ichi !

Gérard :
Hein ?

Débora :
Fôt erwéti l'positif, pa !..Cha diminuera fameus'mint tes notes de téléphone ! (rire)

Josiane :
Mais waie Gérard !..L'vie elle ést belle!..Nou famille elle va s'agrandir !..

Débora : Et ch'est nin fineui !..hein Matthieu ?

Gérard : (s'étranglant) T'és nin...T'és nin..

Débora : Non !..Nin acore, mais cha pourrôt v'nir !..

Josiane: Grand-mère !..J'donn'rôs tous mes vwasses et m'plache de bourgemète pou avwar eç'titre..Cha s'fête ,non ?..I avôt nin du tchampane ichi ...Tchampane ! (criant..on sonne, Gérard va ouvrir)

Hubert : (entrant ave Nathalie) Adan ? Cha va mi Gérard ?

Gérard : Oh ! J'ai foq des bonnes nouvelles depus inne paire de mineutes !

Nathalie : Nous ausseui in a inne bonne nouvelle...Allez, loulou, dis le à tertousse !

Hubert : In arrête el politique !(rires)

Gérard : Ch't'inne épidémie ma parole !

Nathalie : Mais non, nin cha innochint !

Hubert : Ah !..Et bin, Nathalie et mi in va vive ...à deûs !

Josiane : Ch'est vré Nathalie !...Félicitations !..(Josiane et Débora entourent Nathalie)

Débora : A deûs ??...T'és seure ?....Et s'mère ?

Nathalie : Aveuc mi, i sara veute s'in passer, t'in fés nin !

Hubert : A propos Nathalie ! J'ai téléphoné à maman pou l'prév'nir pou ç'swar !

Nathalie: Pou l'avertir qu'in n'allôt nin !?

Hubert : Ah non ! Elle nous prépare inne bonne pizza majon !

Nathalie : Oh non ! (rires)

Josiane : Et adan, ç'tchampane ?

J-B et Emma :

(éméchés sortant de la cuisine bras dessus bras dessous) I
n'd'a pus du tchampane !...(rires des deux...un "oh "
désaprobateur...Nathalie réprimande Hubert et sur ce tombe
l'ultime...

Rideau

Ce jeudi 14 mai 2009

Christian Derycke